






汪
詒
菴
選

頤
芳
集

飛
鴻
堂
藏
板



序

汪駕部秀峰藏書如十萬



卷手自校讐者數十種嘗

出其說文繫傳付剞劂蓋

藝林傳鈔未覩完帙之書

駕部以數十年心力集諸善

本點勘參合而後成書者

持方集
人皆服其精核余以為表
彰前哲以嘉惠來學之功
為更大今年來謂余曰吾
將所選

國朝名媛詩授梓凡若干
矣作者二子家有竒余曰何
若是之多也是死百倍於我

所見向何以能致是駕部曰
吾取從事於此凡足跡所至
搜輯遺聞其有流傳佳什
必錄而藏之至於地志家
乘叢編雜記一切刻本所載
無不編採積之既久今始
成集錄未易也駕部之博

同嗜古窮覽載籍歐陽子
所謂物聚於此好有如是夫
駕部嘗集古印章與

國朝名家所摹刻者次第為
譜各有書哀銘數十餘種
是亦嗜古之一端昔至京師
甫踰年所購古銅玉印不下百

許余見而異之駕部曰此即
得之市中者余曰余亦日驅
車過市何未嘗得一耶此蓋
是以信歐陽子之言矣遂書
之以為序
乾隆乙巳新正平湖愚弟沈初
拜撰

序

關雎居詩之首聖人以為溫柔

敦厚之教必自宮闈始矣而委

巷之婦人女子亦徒歌咏其

性情之所至故十五國風閨門

之言十蓋六七貞淫正變錯出

其閒而褒譏備治忽章已考亭

夫子過疑序說如木爪美齊桓
 韋子刺鄭忽一切指為淫者之
 詞或非其義夫君臣勿友之際
 有難言之隱則託於夫婦以文
 之義起於此端見於彼詩之感
 人綦微哉汪君訥菴所選
 本朝閨秀詩海澁山陬高門縣

薄重搜句討亘以年歲薈萃於
 茲名曰擷芳集蓋本古者太史
 命輶軒采歌謠之意既又別曰
 流品紀載本來使其言不涉於
 疑信而讀其詩則其人與其事
 可知此以見
 國家之文治涵濡於百有餘年

之深自公卿士大夫非至於佩
賦管容膏沐之倫而其詞章之
變態亦百出而不可窮歟歟何
其盛也三百篇之晉既遠而為
鵲黃鵠山高水深之咏興彼夫
秋風之扇御溝之流苞棗之鳥
皆有以抒其怨悵無聊不平之

氣故其詞皆足以不朽若乃廬
江川吏之貞信木蘭之勇武秋
胡妻之義烈雖非其人之自佐
而傳之者亦必以詩信乎詩之
能傳人也雖然不有好奇博愛
之士如汪君者其凋零得滅又
何可勝道哉時

乾隆三十八年歲次癸巳暮春
敬堂愚弟倪承寬拜序



玉田吳鈞書



凡例

一閨閣中吟咏多自寫其幽思不盡表著故蒐羅為
難然古來明慧博識抑塞憂怨之女往往托於詩
以見意非有人專輯而傳之殊多湮沒可惜况吾
聖朝文教蔚興化及閨幃百數十年以來閨中傑出不
惟吟弄風月且能理學兼而有之經濟頗多卓然
可存至如貞女烈婦殉節絕命之篇雖詞意樸率
而浩然正氣自不可掩誠恐選家漏而不錄予故
彙為一編

一自韋毅才調集中已列閨秀專門一卷前明則江

綠蘿閨秀詩評李時遠詩統名媛璣囊諸書而國朝未有專選每附見於方外之後寥寡無幾予故不揣管見特為專輯以見

國朝閨秀之盛尤超越前代云

一是集中稍為分類蓋婦德首重貞節而緇素豈宜溷於禕翟平康未合廁乎副笄故特區別附以無名氏暨仙鬼焉共成十類

一體裁先列小傳繼以省志縣志文同即不復載如有行狀墓志詩集敘跋則節錄其要者至所採取詩話說部則悉照原本

一余留意選輯此編雖積歲時苦為家事間輟艸創甫定兩厄祝融收拾灰燼之餘十存五六原本已失校對維艱白首頽齡誠恐汗青無日故就所現存者急壽東黎閱者幸毋哂其草率

一子生長江左交游未廣博訪無從不過就所有書翻閱或得之一二友朋更望同志有所見聞郵寄指教當續補刊匡予不逮幸甚幸甚

古歛認莽汪啟淑拜白

題詞

萬卷胸羅鄴架齊
卿嫗秘笈荷
管妙寫烏絲裏
綠緹

天題千秋盛業增彤

烏程戴璐
菴塘

研匣琉璃得句多
不辭蒐采到岩阿
苦心百倍然脂集

王西樵所輯然脂集
歷朝僅百餘家
長恐幽芬閔女蘿

裨官野史證遺聞
地志無遺訪更勤
每憶酒邊殷采拾
零紉斷素總香芸

豈徒大雅擅林風
藍袖寧無學步工
不是詩翁勤拂拭
獨教佳話賦泥中

摘芳集卷之一目錄

節婦詩

古歎詞
蒼汪啟淑選

顧若璞
首十二

徐燦
二首

方維儀
八首

方維則
一首

王氏
一首

紀暎淮
四首

竇氏
四首

倪仁吉
三首

秦氏
句

周淑履
六首

吳氏
五首

蔡潤石
一首

董琴
九首

程德輝
句

高景芳
一首

吳黃
八首

擷芳集卷之一

古歛訥莽汪啟淑選

顧若璞

字和知浙江仁和縣人上林苑丞顧友白女適同邑副榜黃茂梧茂梧卒孀居教子著有卧月

軒稿

浙江通志顧若璞仁和人適黃茂梧茂梧早卒二子纔七八歲若璞日為課說詩書又陳諸史百家言命之老年纂黃氏宗譜立祭田事事井然著卧月軒集年九十無疾終焉池北偶談武林黃夫人顧氏名若璞著有卧月軒文集多經濟大篇有西京氣格常與婦人宴坐則講究河漕屯田馬政邊脩諸大計副笄中乃有此人亦一奇也



仁和縣志顧若璞按察使汝學孫女也適諸生黃茂梧茂梧為江西叅議汝亨子早卒時汝亨方宦遊遺孤皆未毀齒每從外傳入輒為陳說四書汝亨聞而善之已又與讀易詩莊騷秦漢百家言汝亨分守湖西致政歸若璞日候中堂汝亨未出則手持一編書屏立以待有所須輒先意具海內賓客滿座治酒食立脩汝亨嘆曰今日正猶兒在也天啟末汝亨疾若璞手調湯藥目不交睫者浹六旬竟不起方汝亨未病時遊西湖過魏監祠慨然而嘆小豎隨而詬之歸憤憤形于顏色會疾作遂有傳其遭毆憤鬱死者崇正改元錄忠臣子孫前語流聞京師至形章奏親黨謀以此乞廕若璞愕然曰奈何欺君且誣吾翁冒蔭以官其子又為書數千百言署子燦名徧質薦紳先生讀之無不肅然改容曰非特義正文亦剴切已事得寢又念宗法亂乃手自排纂為黃氏宗譜且置祭田以永祀事生平慕范希文義莊而力不逮曰後踵為之著有卧月軒稿燦妻丁玉如字連璧好讀書工書法早卒若璞為作壙志

陳維崧婦人集武林顧若璞黃少叅名汝亨之子婦也早年稱未亡人盛有綺才著卧月軒稿行世中有舅姑墓誌銘行狀文章詳瞻學者趨之孫女竣兒法名智生生而端麗能詩歌小令記其宮詞一首曰長信宮中侍宴來玉顏徧映夜光杯銀箏彈罷霓裳曲又報西宮侍女催又咏雪一首霏霏玉屑點窻紗碎碎瓊珂響翠華乍可庭前吟柳絮不知何處認梅花清警殊甚顧性喜學佛歲癸巳病甚父母痛之女曰金鎗馬麥定業難逃大人獨不聞之乎且女特身痛耳心無所苦

年十九天今世說若璞上林署丞顧友白女學使黃寓庸長子文學東生婦生具夙慧尤好讀史上自班馬以迄列朝典故能陳說或論著其大旨又以其餘力自肆于詩古文每夜分執卷諷咏良苦日使吾得壹意讀書即不能補班十志或可咏雪謝庭嘗于食頃作七夕詩三十七首一時嘆其敏妙文章節行為武林閨秀之冠

香閨秀句集若璞錢塘人上林署丞顧友白女
 文學黃東生婦若璞生而夙慧幼嫻詩書東生
 工古文詞以病卒所遺二子
 女彬彬有文皆若璞教之也
 湖船錄顧夫人若璞黃東生配也為子維含造
 船泊斷橋孤嶼幽絕處使吟諷其中名曰讀書
 船作詩紀事有且白獨居揚
 子宅任他遙指米家船之句
 卧月軒稿自序嘗讀詩知婦人之職惟酒食是
 議耳其敢弄筆墨以與文士爭長乎然物有不
 平則鳴自古在昔如班左諸淑媛頗著文章自
 娛則彤管與箴管並呈或亦非分外事也璞也
 不才少不若于母訓笄而執箕帚名門所懼增
 羞父母酒漿組紉勤不告勞盡數十年如一日
 歸于東生之歲君舅謝鐘陵令待命京師父母
 故憐愛余不欲令遠去乃就貳室余得無廢膝
 下歡而東生蚤失恃體羸弱不勝衣君舅廉吏
 既不事家人生產業室中之藏止書數卷余脫
 簪珥佐鷄窻讀又連不得志于棘闈憤懣噴血
 遂慚不可止嗚呼余事東生十有三年疆半與

藥爐為伍後子女漸長食費漸繁未暇覃精文
 苑或稍有所誦抄畧不全間事咏歌大抵與東
 生相對憂苦之所為作也俄而東生溘逝骨鑠
 魂銷惟殯而哭不如死之久矣豈能視息人世
 復有所謂緣情靡麗之作耶徒以死節易守節
 難有藐諸孤在不敢不學古九熊畫荻者以俟
 其成當是時君舅方督學西江余復遠我父母
 兄弟念不稍涉經史奚以課藐諸而俟之成余
 日惴惴懼終負初志以不得從夫子于九京也
 于是酒漿組紉之暇陳發所藏書自四子經傳
 以及古史鑑明通紀大政記之屬日夜披覽如
 不及二子者從外傳入輒令篝燈坐隅為陳說
 吾所明更相率吟吾至丙夜乃罷顧復樂之誠
 不自知其瘁也日月漸多聞見與積聖賢經傳
 育德洗心旁及騷雅詞賦遊焉息焉冀以自發
 其哀思舒其憤悶幸不底于幽憂之疾而春鳥
 秋蟲感時流響率爾操觚藏諸笥篋雖然亦不
 平鳴耳詎敢方古班左諸淑媛取邯鄲學步之
 誚耶年來君舅歸老寓林時令孫輩呈覽蒙賜
 郢削余即不慧異日者其有一言之幾于道乎

題曰卧月軒稿卧月軒者
東生所嘗憇息志思也

和夫子西溪落梅

邈迤入西溪溪深深幾曲斷岸掛魚罾茅簷覆修竹翠
羽何啁啾滿林香撲簌晴雪飛殘英坐愛傾蟻綠鹿門
跡未湮與子同歸宿

原倡短棹隨飛鷗引我西溪曲溪路何濛迂古梅
映深竹二月雪始晴春風吹簌簌翠嶂落寒香相
對眉髮綠日暮憺
忘歸抱影和雲宿

和集字詩

超士弟同兩兒集唐周賀六言律為五言絕十
一首更為六言律一首其約法詳于超士弟序
中余謬為學步殊
覺捉襟肘見也

風蕩柳斜青日遠山餘紫歌發落溪花黃鶯聲未已
歌聲蕩遠溪落日澹歸路別飲餘青尊風生禁城樹

擣衣篇

自惜盈盈十五餘不施粉黛嘆幽居忽驚流浪雙頭鯉
帶得交河一紙書讀書宛轉愁不息征人正在天山北
天山高插礙星流漫駕紅鸞過十洲君掛雕弓控輕騎
妾聞胡雁怨高樓滿眼風光轉眼歇昨夜紅顏換白髮
擣衣聲斷咽霜風掩袖啼多慘秋月秋月孤幃漏正長
香奩寶篋耀華堂鳴璫四面鴛鴦結羅帳團迴錦繡香
鳴璫羅帳芙蓉錦華燭蘭膏明未寢解將珠鏡光如刀

留待君來照鴛枕飲盡金罍不見君湘簾怨卧煙氤氳
羽書猶欲征邊塞願逐巫山一片雲

江上纈絲曲

桃花花繁楊柳垂纖腰嫩臉香風吹鶯兒調聲聲正滑
堂上絲車鳴軋軋少年騎馬挾金彈青鞵朱舩紛夾岸
纈絲終日不忍看寒蟬早晚啼秋幔

艇軒夏晚次壁間韻

日暮炎威靜閒庭月乍盈野螢流箇箇鐘梵度聲聲荷
卷銀塘綠蘋含晚岫青琴尊不復對隣伴夜泉清

秋日過偕隱園

自分窮愁合避喧便攜竹杖到西園蕭蕭三徑人蹤絕
寂寂雙扉樹影繁舒卷無心雲出岫升沉莫問月臨軒
紙窻閒靜無此事寫幅幽芳寄九原

自君之出矣

自君之出矣不理釵頭玉思君湘水深啼痕猶在竹
自君之出矣鸞鏡不曾開思君如璧月皎皎照妝臺
自君之出矣羅幔月娟娟思君如絡緯輾轉一絲牽

湖中

湖光渺渺冷煙微江鶩沙鳧佇不飛恰欲抱琴輕別去
芰荷分綠上羅衣

感懷

不堪愁病強搔頭二十三年感百憂却也不知方寸內
如何容得許多愁

徐燦

字湘蘋一字明深號紫管江蘇吳縣人善詩文
工書畫海寧大學士陳之遴繼室著有拙政園

詩并詞

海寧縣誌徐燦字湘蘋江南吳縣人內院大學
士陳之遴繼室也封一品夫人陳公職史館時
夫人常登寓中山亭望西山雲物好為長短句
梓有拙政園詩餘初集後從公譴居奉天七年
而公即世子孝廉輩亦先後夭折夫人遂布服
茹齋不復以吟咏落人間矣康熙十年九月恭

逢聖祖謁陵還駕夫人瀝血手疏引咎得
俞旨扶輜歸里其著絡緯集之徐少淑即

夫人之祖姑其貞娥徐文琳即夫
人之族女後聘為季子堪永婦

陳維崧婦人集徐湘蘋才鋒道麗生平著小詞
絕佳蓋南宋以來閨房之秀一人而已其詞娣

視淑真似畜清照至道是愁心春帶來春又歸
何處及衰楊霜遍灞陵橋何處是前朝等語纏

綿辛苦兼撮屯田淮
海諸勝真可憑袷

圖繪寶鑑徐燦吳縣人海寧陳中堂素菴夫人
長齋繡佛善寫大士像及宮粧美人筆法古秀

衣紋如葦葉設色雅淡
大得北宋人傅染意

觚賸京城元夜婦女連袂而出踏月天街必至
正陽門下摸釘乃回舊俗傳為走百病海寧陳

相國夫人有詞以紀其事云云夫人姓徐名
燦字湘蘋才華敏贍此其從宦京邸所作

林下詞選燦字湘蘋茂苑人陳之遴相國夫人
善屬文兼精書畫詩餘真得北宋風格絕去纖

· 佻之習其冠冕處即李易安亦當避席不獨為當代第一也

國朝畫徵錄徐燦吳人海寧相國陳之遴素菴公淑配善畫士女工淨有度晚年專畫水墨觀

音間作花艸

隴頭水

西去窮荒恨東看故國愁一心懸兩地雙淚落風流羽檄秋偏急戎車夜不休壯夫輕出塞未到隴山頭

秋日漫興

帝苑芳春鳳吹諧看花曾遍雒陽街行吟緩控青絲轡擊節頻抽白玉釵共挽鹿車歸響隱幾浮漁艇散秋懷霜風掃盡烟霞况愁見龍城葉滿堦

方維儀

字仲賢安徽桐城縣人明大理卿大鉉之女也適同邑姚孫榮年十八即賦栢舟壽至八十四而卒著有楚江吟歸來嘆清芬閣集諸稿

江南通志姚孫榮妻方維儀桐城人歸姚再期而夫亡乃請大歸守志與弟婦吳令儀以文史代織紉刪古今宮閨詩史主於刊落

淫哇區明風烈有清芬閣集七卷陳維崧婦人集桐城姚夫人名維儀無可大師姑女也酷精禪藻其白描大士尤工所著清芬閣集文章宏贍

亞於曹大家矣池北偶談徐元嘆落木菴集云訪江城毛休文

於竺塢慧文菴出其母汝太君畫扇十八面山水草蟲無不臻妙三百年中大方名筆可與頡頏者不過二三日而已近日閨秀如方維儀之大

士倪仁吉山水周禧人物李因胡淨髮草蟲花
鳥皆入妙品安邱張杞園說曾見邢靜慈髮繡
大士極工慈淨子愿之妹又

崔子忠青蚓二女亦工畫

國朝畫徵錄桐城閨秀方維儀同里姚孫榮妻

早寡大歸守志亦善白描大士像阮亭嘗稱之

張秉文清芬閣集序憶子辛丑與姚前甫俱為

侍御公之快婿並轡燕市揚權風雅驩相得也

而內子與姚夫人篋垣協叶耳屬高行邈儔若

詠雪之競秀侍御公居恒咨咨二難廼內子固

自巽清新獨映矣天厄俊人前甫茂年奄忽予

浮沉宦海每歸經其廬不勝車過腹痛之戚間

從內子悉夫人近狀則茹荼噉藥形影相吊纂

組西室尚友漢昭以自况耳丙寅入閩內子紉

蘭集成歸而索夫人近什痛定之餘強為謳咏

輒削其幅今清芬閣所存僅什百之一二者夫

風雅湮微大歷開元奉如著蔡即明興崛起諸

公不無刻畫優孟而夫人沿源審音不濺不靡

浸浸三百之遺明霞蒸鮮洪流奮響夫人即欲

秘之亦烏得而秘之緬惟江漢風教未遠琬琰

之業正何藉副筭善價景仰德輝必有齧指以
相泣者大雀東征休明一代今之視昔亦猶後
之視今也異日頌宜人之篇咏以想見前甫之
生平死者不朽生者不愧前甫亦可無憾于地
矣下

伯姊之粵有贈

昨歲長溪來今歲粵中去此別又數年離情復何語明

發皖江城山川隔烟霧皓月臨蒼波春風滿江樹

北窗

綠蘿結石壁垂暎清芬堂孤心在遙夜當窻皎月光悲

風何處來吹我薄衣裳

秋雨吟

高樓秋雨時事事異往昔骨肉東南居田疇稻不獲樹
葉色將變寒蟲語幽石孤愁多苦心四顧成蕭索雲暗
遠山峯獨坐苔堦夕

擬古

八月天高雁南翔日暮蕭條草木黃與君別後獨徬徨
萬事寥落悲斷腸依稀河漢星無光徘徊白露沾衣裳
人生壽考安得常何爲結束懷憂傷中夜當軒理清商
援琴慷慨不能忘一心耿耿向空房

旅夜聞寇

蟋蟀吟秋戶涼風起暮山衰年逢世亂故國幾時還盜

賊侵南甸軍書下北關生民塗炭盡積血染刀鏃

病起

空齋無事晚風前雨過苔階草色鮮遠岫雲開舒翠髻
新荷池畔疊青錢衰年轉覺多愁日薄命何須更問天
閒坐小窗初病起西林皓月幾回圓

讀蘇武傳


從軍老大還白髮生已久但有漢忠臣誰憐蘇氏婦

征婦怨

霜凍圓河風暮號征人薊北枕金刀從來皆說沙場苦
誰惜春閨夢裡勞

農隙筆談桐城姚太夫人方維儀能古文善丹青
著清芬閣集其讀蘇武傳絕句但說漢忠臣誰
憐蘇氏婦又征婦怨從來皆說沙場苦誰
惜春閨夢裡勞措意極正然從未經人道

方維則

字  大理卿大鉉之女維儀從妹也適諸生

吳紹忠著有茂松閣集

小粉場雜識安徽桐城閩閣能詩文者最多
國初如方維儀方維則才尤博治年十六俱賦
栢舟壽皆八十有四以文史當織經尚論古今
女士之作編為宮闈詩史分正邪二集區別風
烈刊落淫哇君子尚其志焉康熙
年間尚在故予擷芳集亦選入也

題竹

小院何空寂相依獨此君雪深愁易折風急不堪聞白

石移花影青苔擁籀文樓頭蟾月上空翠落紛紛

王氏

浙江永嘉縣人戴大聖之室也

書案

汝不識父面汝當體母心詩書手澤在何必累千金

温州府志戴大聖妻王氏年二十夫亡課遺子讀
書刺指血書其案云云壽八十終子志遠貢成均

紀映淮

字阿男江蘇上元縣人適莒州諸生杜李夫亡

守節康熙中有 旌表

漁洋詩話余辛丑客秦淮作雜詩二十首多言
舊院時事內一篇云十里清淮水蔚藍板橋斜

日柳苑苑棲鴉流水空蕭瑟不見題詩紀阿男
阿男詩人伯紫映鍾之妹也幼有詩云棲鴉流
水點秋光後適莒州杜氏以節聞伯紫與余書
曰公詩即史也乃以青燈白髮之娶婦與莫愁
桃葉同列後世其謂之何余謝之後入為儀郎
乃力主覆疏旌其閭笑曰聊以懺悔少年綺語
過之

劉云份翠樓集映淮金陵人莒州諸生杜李妻
也壬午城破夫被難淮與姑先避深山洞中毀
面覓衣食供姑得不死身與六歲兒皆忍饑凍
栢舟三十餘年以節孝旌問詩係少時作稱未
亡日曰此非婦人事也少作誤

為人傳悔不及遂絕筆不作
陳維崧婦人集秣陵紀暎淮有秋柳句云棲鴉
流水點秋光世多誦之
山左詩鈔壬午之難杜君殉城中淮奉姑避深
谷得不死身攜六歲孤兒茹荼席草三十餘年
以節孝旌門問詩詞皆少
作及稱未亡人即廢吟詠

即景

李花一孤村流水數間屋夕陽不見人牯牛麥中宿

桃葉歌

清谿有桃葉流水載佳人名以王郎久花猶古渡新檝

搖秦代月枝帶晉時春莫謂供憑覽因之可結鄰

秦淮竹枝詞

棲鴉流水點秋光愛此蕭疎樹幾行不與行人綰離別

賦成謝女雪飛香

池北偶談金陵紀青字竺遠能詩少為諸生棄去
入天台國清寺為僧久之復捨去其子映鍾伯紫
尤負詩名女名映淮字阿男嘗有秦淮竹枝詞云
云及笄嫁莒州杜氏早寡年五十餘以節終予在

儀制時下有司旌表之後其從子啟大官莒學
正訪得其遺詩數篇其桃葉歌云云卽景云云

春日幽居

細竹深陰覆碧紗石牀書帙晝拋斜半簾細潤侵寒雨
一衲孤馨染落花流水穿林尋野雀夕陽歸樹護棲鴉
春山淡漠無人共遙倩詩囊貯亂霞

竇氏

直隸大名府人敬松老人竇曰嚴之第三女也
適陳元城二十守寡又二十年而卒著有貞奩

閣集

賦得愛月夜眠遲

銀蟾喜對宵如晝夜涼寂靜三更後素魄將移花影斜
清光已射牕紗透斗轉銀河碧漢流牡丹帶露弄輕柔
熏爐香燼渾忘寐倚遍欄杆幾曲樓

垂絲海棠

依然西府墜柔條露染蕙紅濕絳綃弱態如同飛燕舞
輕盈爭似小蠻腰風前婉轉疑無力雨後參差更吐嬌
靜院無人明月夜錦屏拂檻影搖搖

秋晚

西風吹木葉萬戶動寒砧靜院凭欄久愁心無限深

立秋

梧飄一葉送秋聲風動涼生暑氣清萬戶寒砧催木葉
草根深處亂蟲鳴

倪仁吉

字心惠浙江浦江縣人適義烏進士吳之葵早

寡守志著有凝香閣稿

義烏縣志吳之葵妻倪氏名仁吉浦江人能詩善書畫夫病革矢以身殉夫力阻之且屬以立嗣奉姑仁吉含泣順承時年二十慟絕復蘇事姑猶母撫教為後之子行不窺堂衣不易素姑亡刻像奉之間以吟咏自適有凝香閣稿康熙十二年奉旨建坊旌表漁洋詩話董樵萊陽高士也康熙初年遊金華郡閩秀倪氏仁吉高其人制方竹為杖遺之倪晉駉凝香閣稿跋畧余家祖姑之長於吟詠蓋天性然也嘗讀其全稿以所天有早世之感

故窮苦之言居多獨于山居四時雜詠若干首則又即景興懷夫詩以情而作情以景而生以余祖姑素嫻丹青凡景之足娛人意者無不人諸繪染即無不形之嘯歌擬諸摩詰畫中詩詩中畫殆不是過令人讀之恍在白雲深處疎林斜日中也雖然栢舟之詩誠可歌而可泣人將言愁而欲愁則余祖姑生平寄託亦在全稿耳今春秋日以高行且盡發其藏壽之梨棗若茲帙也聊以誌吉光片羽云爾

山居雜詠

照影雙飛燕新來補舊居芹塘泥最淤慎莫墮琴書

紅葉恰翻階露氣曉如沐山雨忽欲來新香時斷續

宮意圖

調入蒼梧斑竹枝瀟湘渺渺水雲思聽來記得華清夜

疎雨銀缸獨坐時

池北偶談女郎倪仁吉義烏人也善寫山水尤工篇什予嘗見其宮意圖詩云云先考功兄曾得其全集

秦氏

江蘇宜興縣人湯溪令秦延默之女適湯振商
早寡訓子有方著有依桂紉蘭二稿

句

松栢春不花寒天亦常碧

詠署中古栢

三載倡隨今已矣百年懷抱竟如斯

哭夫

訓子

聰明勿可恃力學當以勤意氣勿可施與人當以誠

宜興縣志秦氏湯溪令秦延默女也八歲隨父任對署中古栢吟詩云云人以爲詩識父母早亡效蓼莪體作詩四章人稱其孝歸湯振商生子一女一振商苦讀病卒氏方二十歲作哭夫詩云云聞者憫之子思孝稍長口授四書經史作訓子詩云云是以思孝學行爲士林推重事翁士望姑陳氏孝敬弗懈積鬱成疾年三十九而亡著有衣桂紉蘭二稿行世

周淑履

山東萊陽縣人侍衛周世祐女膠州高蔭栒之室也夫亡守節著有峽猿艸綠牕小詠

國朝詩別裁集婦爲相國會孫女幼工詩于歸後夫婦如師友然蔭栒早歿家盡落母家亦落貧無依藉織紝以生教三子讀書成名下士遠近以女師尊之

高鳳翰峽媛草序畧族子婦周氏侍衛世祐女
 周氏世以文章名家以故婦雅能詩歸余族且
 前相國會孫蔭祿才而能文不幸早世家且益
 窘婦乃提三孤兒走萊陽就食母家未幾母家
 亦中落婦乃復還膠西數年之間奔走枝梧風
 雨漂搖婦詩之所為傷心也婦既歸故業盡失
 乃僦屋為人傭針縫紉以給衣食而教其子讀
 書今三子兩為諸生曰淳曰堂婦年已六十餘
 其操作勤苦無少閒婦既老出峽媛草一編授
 其子淳曰少時吟紅咏絮了不足錄獨此未亡
 人心血所在不可不令後人知我辛苦耳淳
 以問序于予因點次其語弁諸卷首而傳之

擬古

寒松幽谷中苦竹南岡下山空人境絕嗚咽哀泉瀉嗟
 彼蕙與蘭零落委中野蕭蕭風雨來我亦無告者
 志士在首陽飴甘薇與蕨無勞天地寬矢言江海竭死

生不以形心血先銷滅嗟嗟未亡人朽骨對霜月
 軋軋機杼聲漠漠空天雪操作入中宵十指皆皴裂積
 絲豈易成不忍中道絕著此縞素衣怡然歸同穴
 披史教孤兒心折古杵臼自裁亦何難孺子正黃口咄
 哉彼程嬰烏忍釋重負仰希烈士心何以告無咎

秋懷

殘暑方銷歇西風已漸涼高柯憐墜葉疎雨咽寒螿入
 夢新愁積思家舊恨長百年應幾許端的為誰忙

獨坐思諸弟

含愁寂寂掩柴扉疎柳橫窻映繡幃鴻雁幾行聲嗒嗒

掛芳集 卷一
可能一夜向西飛

吳氏

江蘇元和縣人布政吳暘女鄒延玠之室也

七十二峯足徵集氏方伯吳暘女適鄒延玠鼎
革後疑案牽涉延玠繫獄久之竟罹無妄之禍
按律應藉家口氏度不能獲免先數日部署家
政纖悉登籍母太夫人自往視之留同宿沐浴
竟引杯相慰勞了無戚容母語之曰兒行矣律
有贖例便當生還毋自苦氏曰兒少長深閨足
未踰閨能作萬里行乎又安能以秉禮守節之
軀屬人指視乎憶壬午之歲夫子在縲纒兒拮
据薪粟費無所出脫腕錫質銀數笏饋之夫子
詢知其情撫案不樂曰奈何以女子臂上物俾
但僧摸索哉兒聞之愧入心髓今乃遍受物色
曰此某人婦耶語絮絮及更深奚婢皆酣寢母
亦睡熟氏起整衣理妝投繯自盡母醒呼之不
應急披幃視形神離矣家人驚號解置于榻面

色如生一手持其所自畫小像一手握袖袖中
哀其夫獄中所寄書及一箴書古忠孝貞烈之
行以貽之者其女秀姑年十歲
痛母之亡旦暮悲涕不食而死

雨後

斷虹初截雨徒倚小牕前亂水衝籬過斜陽隔樹懸簾
開來戲蝶院靜落驚蟬正好攤書坐蕭然一几偏

春暮

欲覓春歸路拋書遶徑尋花香縈袖薄樹色染衣深舞
看風前蝶歌聞竹裏禽年光無限好誰解惜分陰

題竹

愛看牕外蕭蕭竹未許閒牕盡日扃烟雨却添新染碧

冰霜不斷舊來青家貧已自無開謝

俗傳竹生花主門戶衰

春去

何因有醉醒

五月十三日為竹醉日

最是夜闌殘月裏伴他疎影立

空庭

瓶梅

小玉殷勤採早梅一枝移向膽瓶開雖非明月羅浮夜

時有幽香入夢來

雨中渡湖

亂山深處有輕雷潑墨春雲鎖不開穩夢未醒驚喚起

滿船風雨過湖來

蔡潤石

字玉卿浙江

縣人黃石齋先生配也

本

朝康熙中年九十餘尙存

居易錄黃石齋先生蔡夫人名潤石字玉卿工書法與先生逼似康熙庚辰春得其楷書律詩

一卷楷法稍雜分隸題云偶寄夏太守時山中聞警崇正丙子秋八月蔡氏玉卿書于石養山

中時多崇正中魔道語蓋先生作也

香祖筆記李少司馬厚菴說黃石齋先生配蔡夫人今年將九十而無恙能詩書法學石齋造

次不能辨尤精繪事常作瑤池圖遺其母太夫人云

看海棠

無緒罷彈棋牕外鶯聲巧閒看海棠花今歲開多少蜂

喧只益煩英落不忍掃微吟獨持頤誰識我愁惱

董益琴

字嶧蘊浙江烏程縣人副榜董量女適國學生

蔡雲夫婦皆能詩雲中年捐館嶧蘊銜悲茹痛

遂爾焚筆越六年亦卒著有靜吟集三卷

聞話八月朔日登海寧城外寺樓看日月並出最

爲奇觀因賦長句以紀其事

聞話海間日月翕此景奇絕世無匹夜半移舟抵僧寺
登樓遙望星辰密四維茫茫入表昏天外諸峯霧中失
轉眼驟見水面瑩琉璃灼爍沸聲急須臾照耀萬頃紅
奔鬪驚吼波濤立五色晨霞錦不如鼉鼉趨避蛟龍蟄

金烏玉兔大如輪共浴鯨波吞復吸徐徐並起水中浮
忽然一躍爭先出千尋金柱入雲霄寶鏡旋收光隱匿
乾坤豁達扶桑清飄渺如見蓬萊窟晦冥開朗景不窮
變態百出難盡述返棹入城鷄未鳴九衢寂寂人閉室
靜思奇景神欲飛惜我無緣到難必人生願若酒家仙
醉騎黃鶴弄白日不然直爲費長房縮地千里如咫尺
何堪寂寞墮塵中坐對秋風心悒悒

登樓晚眺

登樓方日暮春色滿窻紗宿鳥喧高樹斜陽照落花天
隨平野澗山作翠屏遮久望渾難去憑欄待月華

秋日自潯溪歸道中作

路入丹青裏帆飛蒼翠間舟行如岸轉山靜覺雲閒木
落鐘樓出村深溪水灣獨歸誰作伴明月送人還

曉發

撥棹出溪口鷄聲起草廬星稀天漸曉風動暑微蘇遠
樹低將沒遙山淡欲無行行入幽境宛在輞川圖

初夏幽居

曲逕疎籬護短牆衡門寂寂掩茅堂雨餘濃翠侵書潤
風過殘紅入硯香詩句却從閒裏得世情漸向病中忘
倦來拋卷唯支枕一榻清風午夢長

新秋雨夜聞草蟲鳴口占

露井梧桐落紗厨涼意生荒村一夜雨砌下起秋聲

新月

蛾眉初上遠山頭淡影斜光照畫樓休道貧家門戶薄
雲霞爲幔月爲鉤

半牕樹影夕陽紅新月纖纖映碧空疑是嫦娥妝束後
玉梳拋在暮雲中

遣興

淺碧紗幮白石牀冰紋笛簟徹肌涼北牕浴罷更衣後
一枕松風幽夢長

程德輝

浙江山陰縣人程鑰女也適天津縣孫泓泓歿

後六年繼嗣定夢泓來迎因作書告舅闔戶自

經

句

梨花空自落

天津縣志程烈婦名德輝鑰女也幼沉敏讀書過
目成誦嘗取殘燭藏之以佐夜讀長工詩性謹密
不以示人隨父客懷慶得故人子孫泓天津人也
妻之初婚之夕夢吟梨花空自落之句意以為不
祥久之泓客夷門歲或一二返返則相對一室往
復今古雖嚴師友不過也而已而泓病沒無子程氏
以死自誓旋因繼嗣未立復強起泓之未歿也氏
依父居常在懷慶至是以舅在津宜奉養遂返津

焉朝夕進甘旨無不先意承志綱紀家政咸有禮
法鄉黨翕然稱之泓沒六年弟明生子曰紹賢程
氏以為己子越明年程氏夢泓來迎遂作書告舅
自明從死之志闔戶自縊卒年三十三卒之夕有
白氣起於室中赤鳥翔於戶內生平作詩甚多
卒前一日盡焚之存者雨霽幽蘭等數首而已

高景芳

靖逆侯張宗仁之夫人也著有紅雪軒稿惜未

之見

晨粧

粧閣開清曉晨光上畫欄未曾梳寶髻不敢問親安妥

貼加釵鳳低徊插佩蘭隔簾呼侍婢背後與重看

句

高捧名花求插髻徧尋佳果勸嘗新

隨園詩話閩秀能文終竟出於大家張侯家高太夫人著紅雪軒稿七古排律至數十首盛矣哉其本朝之曹大家乎夫宗仁襲封靖逆侯家資百萬以好客喜施不二十年費盡而薨夫人暗埋三十萬金於後園交其兒謙始能襲職其識力如此夫人名景芳父琦為浙閩總督作女兒時年十五晨班云云又示謙兒云云

吳黃

字文裳浙江嘉善縣人駕部遠菴之女適孝廉

錢棻善丹青孝廉卽世矢志柏舟著有菽雪集

吳亮中伯姊文裳小傳嗚呼中不天之酉喪我先君子煢煢在疚游丁兵燹專厲強壯蠶氣幾蹈於不測惟我寡姊相見也相持而泣歲丁亥免喪亂亦稍定收名魂魄將圖寧字詎意戊子

而我姊又舍我以逝也耶甥燾率其弟譽請余為立傳握管間追溯年來同氣急難之情卽淚泫泫成也嗚呼孺人諱黃字文裳先君子駕部遠菴先生女嫡母陸孺人出資性明慧絕儕輩嗜書好風詩與楚辭雅善吟咏亦工繪事意志蕭散涉筆絕無閨幃氣居然櫛士也而貞靜婉嫕不欲以才自見先君以故奇愛之擇配得相國塞菴錢公伯子孝廉君棻于歸後事尊章先意承志凡可以得歡心者無不至念相國公生孝廉猶廣置姬媵以奉宗祀曩庶出也撫愛與出腹等姑孫夫人嘗曰此吾佳兒婦也憐愛之滋甚孝廉以弱冠魁鄉薦出漳浦石齋黃公門石齋講學禹航之大滌山孝廉負笈從每歸省孺人輒舉先君當年講學錫山所以艱苦刻厲者焉壬午孝廉即世遺子道各二孺人承相國命茹哀撫孤教誠如嚴師婚嫁皆得禮意申酉間叔氏文部君毀家紓難自一筋以上皆廢以餉

軍孺人亦撤環瑱及先君所分質庫助義數日
都盡主者以會冊進孺人慨然曰世受國恩固
當恨力止此耳命火其冊嗚呼髮髻借老義無
二天至雞鳴戒旦穆木逮下此世俗所難而賢
知固能之若乃無衣之義何與惇弱女子乃不
恤其緯而宗周是憂讀其聞王節婦淑英倡義
詩吾亦髮髦者深閨愧執爨句貞明執操冠幘
其慙哉孺人歿戊子七月一日距生于戊寅三
月十八日年止四十一其歿也相國哭之慟曰
天乎奪我二子又奪我賢媳命哀其遺集得詩
賦雅文共五卷集舊名荻雪以余家茜溪鶴湖
文水映帶左右當霜清月白時荻花縞潔如雪
孺人懷之不忘有肥泉竹竿之思其孝猶可思
也畫亦蕭疎有邱壑間意得之者比拱壁云
曹爾堪荻雪集序畧余亡友錢孝廉去非淑配
吳孺人吾姨也其次子子明又婿余嘗手抄孺
人荻雪集詩文請予序以梓之子諾而未作子
明竟歿余且傷心不忍復視矣一日過得求堂
看女見其架上編在焉未亡人泣然而告曰
此亡婚所手輯也生前每欲梓之今則已矣子

聞愴然既感東床之痛復紉西州之誼爰爲序
曰夫詩文之作根於情性情性所觸緣於境遇
境遇有苑枯而情性無轉移是非涵浴詩書漸
陶德義求其樂而不荒思而不貳哀而不傷怨
而不怒者難矣况笄幃乎孺人以明慧之姿長
膏澤之第南都石黛最發蛾青東國機杼足供
統素乃駕部儒者孺人能婉婉承之芸窗借視
惟愛編蒲菊葉留銘只憐勁草其有作也貞靜
而不流從容而合度靜而讀之居然櫛士也及
其言辭鏡閣作嬪鼎門君舅爲黃閣之元臣夫
婿復烏衣之才子不啻青鸞翡翠之婉變矣乃
發三花於墨瀋每勸從師萃五岳於筆峯惟懷
借隱覽畫蘭古栢諸篇倡予和汝其有雞鳴昧
旦之思乎若乃從夫子舍隨任官齋渡長江陟
鐘山仰豐鎬之舊都弔齋梁之殘闕臨風舒寫
眺古籌躡曹大家之賦東征何以過也至於捧
賜紈而紀恩展妙容而作頌則又於香奩形管
之中聿兼清廟明堂之製嗟乎以此清才復兼
令德姬姜遜美翟芾何慚詎意頓邁家屯旋艱
國步夫子修文于天上叔氏抗節於汨羅而孺

人亦播遷荒野愀愴虛房恨極黍離悲深荼毒
 平津之閣惟聽啼鳥延尉之門真堪羅雀於是
 擬班姬以自悼仿王粲之七哀宛轉悲涼悽愴
 到漁卒之守共姜之明誓咏栢舟之清歌向平
 遺累甫慰於所天荔帶深盟遽從於下地此其
 志節矯矯不誠極境遇之苑枯而情性無轉移
 者哉嗚呼有無命自古所悲立德不朽傳諸
 在昔雖坎壈於晚歲終照爛於他年夫何蘭摧
 玉折又至此也嗟爾未亡念哉母德序茲遺草
 以付嗣孫雖一編自壽不矜元晏之序言而九
 原有知聊慰亡
 倩之遺志云爾
 小粉場雜識分湖閩秀吳文裳名黃著有荻雪
 集聞詩甚高古遍訪惜未得見頃蒙友人抄寄
 其分湖賦果佳恐散逸因錄之俾後之修邑乘
 者可採入焉其賦云稽古帝王體國經野憑山
 川以正域滌有截其分湖實表鎮於澤國洸瀆
 華亭之南澎瀆嘉禾之北襟帶禾松控引浙直
 其廣也環行十里而有奇其深也垂千緘而莫測
 五湖遙瀉行三湘七澤之波一水分馳壯三泖

九峯之色能止朗陵之爭不借左慈之力劃焉
 中斷似剪并州之刀豁爾平分絕勝薊邱之植
 乃吳根越角所割判而武水松陵之表識其為
 水也紆餘宛渾撇烈汪洋鷺乎瀉瀉如牆虛涵
 澄焉如練平焉如莊激焉如矢立焉如牆虛涵
 玉宇直走銀塘蹙微風以激灑騰越羅楚練之
 文章鼓奔濤而震蕩若黃鐘大呂之鏗鏘春水
 灌而不溢其量秋潦盡而不涸其藏遶以灘瀨
 環以阡陌汀渚縱橫沙礫所積於是乎溪毛爭
 披野卉紛拆陵蘅菁莪薔薇蘿薜薰風十里芙
 蓉春雨千畦麥乘流翠苕干尋照水新篁百
 尺蓴絲縈逸士之思草帶表義塾之澤緋桃碧
 柳和曉露以迎曦朱蓼青蘋拂涼颺而向夕參
 天綠雪松圍鮑老之園噴日紅霞花老陸郎之
 宅於金衣玉羽黥甲青襦公名美舌國號長鬚
 涵濡金衣玉羽黥甲青襦公名美舌國號長鬚
 碧海舍人之皓潔紅襦祭酒之清腴春殘帝魄
 秋盡王餘鳩有婦而鶯有友魚有婢而鴈有奴
 錦鱗比目以游泳文禽其命而相呼莫首莫能
 計畫史不勝圖既時以旨洵美且都擁劍紫鰲

伴橙香而佐筋披綿黃雀漬蘭酒以充廚豈必
 雪翻雲橫獨下華亭之鶴霜刀縷切別慕松江
 之鱸若乃舟楫爭馳毛生捧檄以南來季子懷
 橫青雀鬪黃龍軒翥綠鬢倚柁樓春生客去浮
 書而北赴商歸陽翟持竿漁父趁明月以投綸
 梁皓腕抱檀槽夜訴持竿漁父趁明月以投綸
 荷鋤田夫倚斜陽而喚渡白足沙頭蕭寺僧紅
 衣水田蓮舟婦日落樵歌隔水聞風微牧笛穿
 林度皆足以點綴雲物之華增長溪山之趣爰
 有東山逸客南國詩豪初辭軒冕乍返林皋有
 良朋以結伴有難主以相招挾飛瓊之麗質泛
 釣雪之輕舸流連煙水跌宕風騷紅袖捧紅螺
 之盃白蓮泛白玉之醪餞鷓鴣於柳岸佇蟾影
 於松稍鐵鑿一聲吹起湖邊宿鷺冰絃三弄驚
 浮洞底潛蛟別有高躅駕短棹兮夷猶趁寒波
 之清辭企鐵仙之高躅駕短棹兮夷猶趁寒波
 而洄澗逢江上之老漁話斜陽之孤鶩月露
 之清芬寫霞天之巨幅日落平蕪烟高古木吐
 雲鳳之離襟燦江花之簾篔簹流珠噴雪光搖泉
 客鮫宮裂石穿雲聲振馮夷鱗屋然而日月如

題畫竹

梭人生幾何林催後葉水讓前波嗚呼王貌絳
 脣既魂消于朽壤錦心繡口亦骨冷於山阿諷
 武林之篇空餘衰草訪節制之墅老盡青柯蕭
 條雲水寂寞林蘿幸文章之可托留姓字於不
 磨矧余躬之渺末獲勝境以婆娑敢與懷於往
 昔爰撫手而清歌歌曰一曲分湖清可俯湖水
 云云自前古鳳琶鶴筆最風流金粟珠簾共歌
 舞玉龍沉波化不回金鰲失水更堪哀惟有松
 巔一丈月照人
 好去讀殘碑

平生愛此君拂紙作數筆直幹凌雲霄清風奪炎熱桐
 孫初倚雲松花如落雪北窗午夢回恍聽聲蕭瑟
 夜坐

虛帷淡明缸文窗饗密雪咏絮少清才殘編試繙閱蘭

掃芳集 卷一
膏黥欲消香篆微看滅侍兒呼不起嚴風振林樾

春曉曲

曦光欲上春窗曉窗前百轉啼黃鳥聲聲似爲報幽人
勸我花開應起早徐呼侍女著春衣獨對花壇望欲迷
彷彿武林溪上路輕紅一片自霏微

秋夜聽琴

秋山寂寞秋月明秋風瑟瑟增秋聲幽人夜坐淡無思
閒呼侍女調鳴琴徐撥冰絃拂焦尾一縷香煙縈玉几
凝神覽譜辨宮商先作高山次流水高山流水續續操
眼前未覺名山遙劃然匡廬出窗戶珠璣歷落飛奔濤
左手循絃右手撫孤鶴冷語煙渚七絃次第忽亂鳴
萬斛松風響茅塢松風菽菽怡我情一彈再鼓渾忘曙
蒼聲初罷鍾又鳴耿耿玉蟾墮西嶼

山居

我愛山居好山花足賞心綠雲連野徑紅雨點芳林桂
老巖堆粟籬疎菊滲金幽人淡無事趺坐對瑤琴

春閨

韶光潛入幕暖色滿蘭房蝶影翻紅葉鶯聲碎綠楊神
閒花自淡境靜晝逾長春恨何由擾朝朝凭繡床

西溪觀梅

十載西溪繞夢思扁舟今喜繫花枝人如姑射逢仙日
景似山陰訪戴時細嚼冰漸清沁骨亂翻雪色冷侵肌
問他翠羽羅浮夜似此幽馨知未知

蓼花

冷落西風澤國秋枝枝搖曳滿汀洲白蘋老盡殘荷歇
粧點池塘景物幽

擷芳集卷之二目錄

節婦詩

古歎訥莽汪啟淑選

吳永和十五首

劉氏一首

何桂枝一首

張氏四首

陳永靜一首

林氏四首

陳婉永十三首

嚴姜句

錢鳳綸十一首

廖氏一首

葉招男句

謝氏三首

孫思姪三首

范氏六首

湯尹嫺一首

吳氏二首

方月容四首

擷芳集卷之二

古歙訥菴汪啟淑選

吳永和

字文璧江蘇元和縣人明布政吳暘女孫也適

國子學生董玉蒼著有苔牕拾藁

七十二峯足徵集氏名永和字文璧方伯吳暘
之女孫文學淑盛之女宮詹莊澹庵之甥女也
生而淑慧舅父母愛之撫以爲女莊故世家宮
詹早貴多才藝廣賓客家有園亭聲伎之奉服
食器玩一往綺靡女居其間泊如也勤習女紅
誦讀經史悉通大義宮詹器重之不欲嫁凡子
適故人之董生時喪偶而有子無意再娶感宮詹
欲妻之董聞女賢遂應命歸而娶焉生祖寅如官
意厚且聞女賢遂應命歸而娶焉生祖寅如官
大參父天來官通政以清節聞遺產無幾生少

孤連遭內外喪日近窘迫至鬻所居之半人或
 非笑之因內自傷思振家聲憤力學累試不
 售鬱鬱成疾將卒呼內子與訣曰吾有三事未
 了先大夫墓碑未立前室吳氏未葬子幼未成
 立以是累汝語畢而逝時氏欲死者數矣念未
 可以死勉起治喪念孤兒不可一日廢學節縮
 衣食延師教之具禮幣求名人為通政公作碑
 銘勒諸墓道又卜地舉夫與前室之柩合葬焉
 子學有成為之娶婦數年之中諸大事畢舉中
 外翕然稱之氏早喪父念母老而貧贖所鬻故
 居之半迎母共居及喪之使幼弟與已子同學
 飲食教誨之待前室之母如其母視其兄弟如
 已兄弟性度嚴重遇可喜事未嘗露齒當極拂
 意不聞怨怒聲內外斬斬家政肅然云夫歿二
 十餘年凡夫所未及言而心欲為者皆次第為
 之俾無遺憾於九原少能詩詞嫠居屏去筆墨
 有請者輒不應曰此非未亡
 人事也所存有苔牕拾藁
 見山樓墨話閩秀吳永和苔牕賦敝廬之北鄰
 圖之前縱橫半畝歌側數椽蒙翳於蔓草迷漫

於荒烟迺葺小齋營狹室逍遙兮容與偃仰兮
 棲息任平行之碍眉審易安於容膝爾迺左排
 藜牀中列棊几琴拂嶧陽之桐詩裁浣花之紙
 書裝玳瑁之籤硯浴薔薇之水則復面以素垣
 帶以紅欄花疎疎兮三五樹竹嫋嫋兮數十竿
 簾非水晶而不下屏非琉璃而不寒當其新葉
 並抽繁英齊吐杏蕊紅兮覆屋棗花白兮罨戶
 紫燕壘於風檐黃蝶翻於蔬圃飛絮撲人遊絲
 橫路及夫高樹蔽日清波送涼扇襲素紈團來
 小月衫裁白紵剪落輕霜掃逕則竹籜盈砌拂
 簾則花瓣半牀又如涼風欲來袂衣換早哀斷
 雁之宵征驚疎砧之夜搗響敗葉於空階泣亂
 蟲於衰草至若歲聿云暮天寒白屋朔風吼樹
 凍雪折竹戶掩雙鑲窻扃六幅擁竹爐之初紅
 試鄰缸之新綠若乃朝日晃耀晴烟霏微苔痕
 上皆草色侵衣鳥送歌來蜂抱花飛時而雨濛
 濛兮如絲雲黯黯兮潑墨樹濕新痕花蕙故色
 倚薰篝以生潤對紙楞而易黑至於疎鐘初動
 仄徑無塵疎星在天纖月窺人豈持燭而書誤
 亦聚螢而稱貧於是撫流光以怡顏感造物之

無盡或擷畦上之蔬或劚林間之筍或撲皺玉
之棗或採連珠之菌憂藉萱草能忘年有昌陽
可引况乎志先淡泊心非崇侈檢書課蓬頭之
子潑茶訓赤脚之婢地僻則喜其面城景幽則
忘其背市優哉游哉完矣美矣
笑介蟻之浮沉歎風獨其奚俟

詠緹縈

隨父西上書天子憫其語能令爲父心不復悔生女

虞姬

大王真英雄姬亦奇女子惜哉太史公不紀美人死

題山中舊居

舊宅空山裏蕭閒白板扉路侵松葉暗徑長藥苗肥曉
鏡湖光入春衫花氣飛鄰姬逢穀雨時見採茶歸

地僻耽岑寂閑居事事幽牕開雲作幔簾捲月爲鉤撲
漉山禽下琤琮澗水流更饒憑眺興女伴共登樓

偶題

節物最關心年華兩鬢侵鶯桃初上市燕筍漸成林罷
繡看山色移琴揀樹陰未須嫌嬾慢聊欲散煩襟

宿莊表姊放園卽事

背郭名園景色幽連宵樽酒共淹留玲瓏牕檻琴書靜
窈窕溪山花木稠坐久每遲明月上談深不覺篆烟浮
秋光到眼多佳句愧我蕪詞未敢投

奉贈澹菴舅氏赴召

掛芳集 卷二 三
十年林下足詩狂又被徵書赴上方
馬勒曉銜邨店月
貂裘寒擁客途霜
鳳池重沐恩波濶
鸞掖還聞禁漏長
共此一尊千里別
渭陽何日再持觴

雨後

隱隱輕雷夕照中
薰風送暖入簾櫳
芭蕉着雨抽新綠
芳草和烟襯落紅
小榻夢回消茗椀
虛牕人靜檢詩筒
啼鶯漸老添雛燕
却訝年光似轉蓬

語外子玉蒼

他年偕隱卜幽居
流水空山一草廬
風外鳥啼移晚竹
雨中客至剪春蔬
低牕茗椀隨棋局
小榻爐香讀道書
安覺此心貧亦好
眼前漂泊欲何如

苔牕秋夜

靜夜新寒重
虛牕落葉輕
伴人愁坐處
殘月亂蛩聲

苔牕四詩絕句

香裊晴牕六扇紗
窺梁燕子語周遮
青苔初長無人掃
簾外輕風落杏花

石徑花關側數椽
竹林拂篔簹枕書眠
桐陰滿地日當午
幾樹啼鶯幾樹蟬

疎欄如帶繞迴廊
香逗簾鉤桂子黃
可愛晚來幽絕處
一痕新月竹風涼

銀葉香寒烟透遲蠟梅瓶裏嚮冰澌添衣曉並欄杆立
貪看山茶雪後枝

語女伴

莫訝隨行步每遲難將愁緒訴心知比來欲識儂懷抱
試看芭蕉未展時

蓮坡詩話毘陵董玉蒼妻吳文璧永和以貞節聞
所著苔窻集着語清新有語諸女伴句云云吳江
潘稼堂
為作傳

劉氏

浙江鎮海縣人同邑林鼎新之室也

古檀詩話節烈不磨鎮海林氏雙節祠氏為兵
亂矢志捐軀于黃庭帖後題絕命詞云云遂同

殉悍帥聞二氏事稍止淫掠兼寬出郭之禁年
友丁容溪蕭山人修志時為立傳并吊以詩云
西風夜雨讀黃庭遺句千秋照汗青鶴唳頻傳
粉社恨蛾眉頓化海風腥死生分定輕溝瀆節
烈名高炳日星楓荻蕭蕭陰火綠荒祠江上弔
湘靈容溪與余同教習宮館以吟箋見貽因悉
其本末而
記之如此

絕命詞

生有命死有命生兮妾身危死兮妾身定

鎮海縣志李氏諸生林穎新妻劉氏林鼎新妻善
詞翰順治丙戌定帥蓄異志為亂邑中人惴惴不
自保李劉交以死誓李常提幼女用色絲繫其臂
而泣劉於所臨黃庭本尾題詩云云亂起李劉各
繫帛於頸聞急自勒穎新兄弟急解之李已不可
救劉復甦謂鼎新曰一死一生人謂我何遂絕邑
令喬鉢表其事立
祠祀之碑存梓山

何桂枝

廣西桂林人也幼失父母賣爲人婢攜之揚州
後嫁浙人官給諫爲妾自怨已命作歌一篇士
林爲之傳誦詳見後注

悲命詩

六月六夜雨聲急有女不眠悲思集側耳東方人睡酣
倚牀低首羅巾濕有恨無可伸有語向誰陳坐對中宵
雨長嗟薄命身我本廣西城裏女此處命孃非我親暗
想八九年前事寸心耿耿獨傷神憶我六七歲父母雙
拋棄寄養向貧親貧親無好義溥梧將軍門下客一時

假虎烈威勢與得金錢知幾何甘心鬻我作人婢爾時
幼小只從他薄命飄零可若何當年攜到揚州地山程
水程萬里多揚州一入主翁宅年復一年誰愛惜朝捧
茶飯暮捧湯寒缺衣裳飢缺食主翁有時稍見憐主母
鞭箠那禁得忽然年來情意改當作親生女兒待許我
呼翁與呼孃梳頭裹足勤勞倍不知奸計險於坑謾道
厚恩深似海簫管琵琶學已終牙牌雙陸亦教通纔延
李姐傳歌曲又向張姑習繡工事事求全勤督責朝謀
夜議誰能測春來春去時忽忽道我長大好顏色嫁得
富翁貴公子終身享用無盡極昨朝客到敞華堂逼我

堂前見客忙不識誰家輕薄子周身上下細端相但見
爺孃喜滿面我正無顏歸繡房驚猜不敢問自知徒自
恨耳聞堂上言贏得心中悶方知堂上賓乃是浙中人
工科給事官名重六十無兒娶妾新豈是尋常行禮節
只聞次第講金銀怪殺爺娘心慘絕千金百金爭未歇
我生時日我不知朦朧造作與人說初五聘定初七嫁
却道行程圖快捷可憐我貌空如花可憐我命真如葉
今日人家呼作兒來日人家呼作妾以此傷心怨復嗟
夜深掩涕肝腸裂蚤知粉面換黃金悔不當年墮江月
已矣哉且莫哀不見揚州舊風俗親生兒女嫁天涯天
涯復海角骨肉之間豺虎惡我復何須淚零落淚零落
情未休長江之水無西流風俗不改古人愁寄語紅顏
綠髮閨中女來生誓莫生揚州

何偉然廣快書桂枝姓何氏本桂林人五六歲時
失父母母族人收養之以貧鬻於潯梧將軍門下
客所客揚州人也愛其白皙萬里攜歸作婢充
使令實幼且嬌不任供役主母嚴切是畏漸嘗諸
辛苦者四五年顏色反不如五六歲時十有二歲
偶夏日沐浴竟徒倚檐楹間面目頓生光艷主母
爲之心動語主翁曰此奇貨也幾失之矣揚俗喜
養女嫁富貴人爲妾雖遠而蠻狄得金多無復顧
忌也其女亦多屬貧而鬻者兩城內外日日媒姬
絡繹於道鬻女例一歲值一金稍稍有姿容輒昂
其直其買之者不盡多財家也或有典物以買女
者大率利其後來嫁富貴人可得多金且或以美
色專房或以生男見寵則養女之家一切賴之故
俗號曰養瘦馬瘦馬而肥價必高也何氏女既有

貌可售其主翁主母一旦喜之釋其賤役呼之為
女令女呼已為父母母二三年珍愛之如已出女得
其珍愛之也肌態遂備諸好而慧性亦發所教者
無不能焉偶一文士過而見之噴噴稱羨謂其父
曰此非桂林之枝耶其父遂請更美名文士曰即
名以桂枝可自是其父無女而有女驕語於人及
諸媒姬是年桂枝甫交十五夏六月有浙人官給
諫者年六十無子覓妾於揚來眎桂枝初出見客
羞澁萬狀心不樂甚顧給諫公一見當意遂以寶
簪授媒姬插桂首不恡多金以聘一切如其父母
所希求也時自燕來亟還於越以初五日晨聘即
以初七日夕登舟初六日大雨桂獨不能寢前後
記憶憂切涕零乃作歌一篇以悲己之命因以閔
揚之俗云云是夜於燈前作小楷書錦箋一幅藏
卧簾下明日給諫公命駕肩迎去其母送之渡江
至崖而反一日於桂卧簾下得所書錦箋以白其
父其父以送向文士觀之文士大加惋歎曰惜哉
桂林一枝乃不屬少年郎折宜其怨也亟使搜他
墨蹟一字不可得因錄其歌而傳誦之後逾數年
桂父母家大陵替議往桂處有所求而桂適信至

蓋侍給諫公不一年已作古人桂無出也其嫡初
欲遣歸已於眾妾中獨憐桂性不妄言動能順意
旨留以為伴桂遂一志
謝朱粉長齋奉金仙矣

張氏

山東德州人處士張禎之女適知麗水縣田緒
宗大中丞雯翰林院編修需之母也封太夫人

著有茹茶吟

王士正田母張太君墓表略母張氏德州儒家
女父曰禎女紅之外教以書史輒能通知大義
笄歸于田齊魯間所稱蓼庵先生者也先生壬
辰登第知浙江之麗水縣未幾屬疾不起母髮
踊稍間則取倉庫冊領勾稽籌算年經月緯具
有條理不以假胥吏既而攝篆者果難之母手
自削牘請太守盤餐處州守王君臨縣母以藉
進攝者頰首服無以難也乃得攜諸孤間關四

千里扶欄以歸督諸子讀書而身自紡績往往至戌夜長子中丞雯中子太史需相繼登朝居華要母四膺 誥

封稱太恭人

山左詩鈔張太恭人年七十時司寇及太史官中外親鄙議張屏設宴為恭人壽恭人聞之為書以示諸子曰示雯輩女昨來言里中先達及學校父老謀欲釀錢作為屏幃為吾壽者此親輩盛心然揆諸情理則甚有所不可今詳為女曹言之按禮婦人無夫稱未亡人凡吉凶交際之事不與不為主名故春秋書紀履綸來逆女公羊傳曰紀有母所以遠別也後世禮意寢失學云婦人無外事所以遠別也後世禮意寢失始有登堂拜母之事戰國時嚴仲子自觴聶政母前進百金為壽此蓋任俠之流有所求而然耳豈為禮當如是耶吾自女父歿于官提攜細弱千里扶欄含辛茹藥三十餘年閭戶辟績以禮自守今幸女曹皆成立足慰餘年然此中嘗有隱痛歲首臘臘兒女滿前牽衣嬉笑輒怛怛心動念女父之不及見故或中坐嘆息或輟箸

自句容歸里

而悲蓋三十年于此矣三十年吉凶交際之事不與知而今更强我為主名其可謂之禮乎頃者米價踊貴井里蕭然親故類多貧乏若復合錢市簣為未亡人進一日之甘是重有戾矣女曹備官于朝宜曉大體其詳思禮以安老人之情惟勿忽也君子讀恭人書箴以為知禮不異敬姜之訓

文伯云

流水青山在眼前歸途恰值早春天官貧一路無車馬
覓得江南鴨嘴船

戊申京邸示兒

金馬門前玉漏殘經年索米向長安悲歌莫逐荆高侶
且耐官同易水寒

示兒

一部楞嚴戶晝扃木魚竹杖倚圍屏老人自覺修齋好
不爲兒曹講佛經

送長兒之楚

黃鶴樓前白浪生江流滾滾鄂王城倘從鸚鵡洲邊過
一弔才人禰正平

陳永靜

字閒軒浙江海寧州人贈太傅容菴公之女也
歸華亭葉忠節映榴忠節死陳夏包子之難夫
人扶太夫人以歸教養三子咸登仕籍

與圓明女師談禪

不落機鋒豈鈍根茶瓜留客話桑門蓮臺色相依然在
龍巖經函具共論幾杵霜鐘消白晝半龕燈火定黃昏
繁華勘破真生受我亦生平拜佛恩

林氏

廣東新會縣人林奇鳳季女也適襄陽宣威將
軍申有功相夫訓子以貞節著聞兼工吟詠著
有畫荻草

霜竹

孤挺三冬日枝枝映楚湘蕭疎持健節蒼翠帶寒霜月

色籠陰薄風聲引韻長林中還有實留得鳳毛香

菩提樹

智藥曾培植攜來西域船高枝成寶蓋清影散諸天
虞苑流陰遠唐朝得法先自從盧祖悟色相總非禪

大通寺

海暖風和放小舟滿天烟景好追遊青山疊疊渾無影
綠水漫漫靜不流佛祖昔年留妙偈頭陀今日繼靈修
菩提自是西來種今古禪叅尚未休

秋夜獨坐

日來秋氣滿林塘獨坐閒庭過夕陽颯颯西風鳴晚樹
蕭蕭殘葉落東牆閉門自喜紅塵遠顧影偏宜白髮長
誰有凌霜真節操歲寒不使後凋傷

陳皖永

字倫光號汲雲老人浙江海寧州人工部尚書
文和公妹適副榜楊語可侍郎楊雍建子婦也
生三子長庭玉仲雅度三開緒皆自課誨著有
素樓稿八卷破涕吟一卷

西湖志陳皖永字倫光海寧人兵部侍郎楊雍
建子婦康熙戊午科副榜楊慎言妻著有素賞
樓藁若干卷

楊大晟素賞樓稿跋略素賞樓詩集係吾母所
編訂先兄庭玉公力疾讐校釐爲八卷不以輕

示當世承母志也及先兄歿後吾母重傷先兄
 之心因跋數語授之大晟弄篋箏者三閱歲矣
 念吾母稟外王父母家學禮教來歸先君子時
 祖父司馬公方以文章氣節為海內推重庭饒
 賜書孺古香染柔翰差足樂也自後家運舛
 中年傷於懷抱時時獨絃哀歌一寫其悲憂憤
 懣之志今集所錄強半皆然丁酉春正月吾母
 六十正誕子婦謀乞言稱壽殊不色喜為詩四
 章切誠晟勿作無益晟勿敢違顧念吾母春秋
 唯晟一人侍膝下晟又孱劣無似不克恢宏前
 烈屈茲祝嘏之辰慙焉寡歡惟是吾母數十年
 苦心勞慮行險坐愁之所為作者家門榮落之
 概得諸親歷懿訓徽音亦於此乎在非借手他
 人祝嘏之章務觀美於屏障者比爰啟邱嫂沈
 中嫂蔡僉謂庶藉是仰娛萬一請脫簪珥佐晟
 授之開雕以侑康爵皆取諸是編足矣吾母笑
 而頷之凡鳩工三月乃竣其破涕吟
 一卷則年來弄孫之暇口授居多焉

君馬黃

君馬固神駿我馬非駑駘伏櫪良可歎世無黃金臺

海棠歌

立竹堂前花散綺紛紛佳麗矜紅紫主人惜花惜分陰
 日日凭欄看不已開時欣賞落時悲詠嘆有詩哀有誄
 所嗟榮瘁瞬息間妖艷濃香何足恃梨花雨裏杏花風
 簾影低垂窻掩紙花少愁多且晏眠朝來又被鶯呼起
 海棠一株更奇絕昨夜春風折芳蕊亭亭獨立庭西徧
 賦質清妍無塵滓桃李無顏蘭蕙愁羣芳辟易失其美
 珍重名葩故後開天與陽春相礪砥傾國姿容本絕倫
 神仙標格誰能比朱唇鮮綻點臙脂粉面微瑕補獺髓

淡煙籠景更幽閒清露滿身嬌欲倚纖弱紅絲裊裊垂
玲瓏翠葉層層庇不肯有香供褻翫雖然絕豔非奢侈
晴暉照耀自爲容夜雨飄零死知己淵才有恨亦癡絕
杜陵無詩未嘗是華清宮裏何如人春睡嬌酣敢輕擬
石家欲貯金屋中誠哉肉食言可鄙昔人唐突非一端
詩成爲君雪前恥酌酒與花花莫愁千秋幸有吾知爾
好對尊前聽我歌雖愧無文質不但含情無語意若何
玉暈微紅半嗔喜

敝衣行

秋光漸老羅衣薄江楓墮冷木葉飛處處坐月急砧杵
霜風催我尋故衣短襦浣濯去塵垢連歲補綻新聞舊
尙可著絮未忍棄庶免肘見換長裋我思古人真我師
繡移曲折老杜詩布裙操作風足尙何況杼柚空無絲
縫紉完好喜溫輒狐白貂茸孫輕暖夜寒初試出熏籠
素綾被覆和香卷

夏日遊蓮池尼菴

齋心過蘭若叅默致精虔聞布黃金地來皈白法筵道
心安止水霽色淨諸天得侍維摩室時聆上乘禪
殘暑猶思避凌晨出郭行衰扶藤杖瘦穩坐筍輿輕莞
爾瞻旛影冷然聞磬聲松壇緇素遶輟講下階迎

掛芳集 卷二
千秋不剪拜祇樹蔽甘棠桂老幽巖古松高深殿涼遠
峯青入牖斜月淡侵廊荷渚清無暑微風暗遞香
竟日開簾坐悠然對遠峯茶烟颺風細香篆結雲濃閒
置忘言拂疎傳出定鐘風幡任自轉根鈍欲叅慵

豆腐

屑豆成佳品磨礮絕可憐無端遭浸潤有力碎勻圓縫
布千鈞壓然其幾度煎一方完趙壁百葉疊吳綿玉糝
餘渣滓瑤漿泛粥餽調鹽凝鼎內借箸析尊前至味惟
宜澹恒情頗尙鮮茹冰甘欠蘗嚼雪滑無羶勝肉能消
鄙如酥喜不羶盡歡供滌滷示樸佐盤筵潔以孤行見
馨從衆口傳咄嗟貧易辦藉爾養衰年

戲咏不倒翁

頗矜文采列衣冠鎮定閒嬉品自端孤立無依能禦侮
高眠不穩敢偷安搖頭似畏人情薄裏足因知世路難
推重傾危多莫論雲泥自向一身看

上巳日清明二首

秋千風定祓除天上已清明景共妍待燕簾櫳人悄悄
餞花庭院雨綿綿新分幾點榆根火不禁千絲柳葉煙
蹋遍青青觴曲水賞心還勝永和年

輕雲弄日晚晴天萬戶青葱柳色妍留得夜鐙從乞火

既成春服未除綿桃花水暖初修禊榆莢風高已禁烟
一片詩情刪不得錦囊有句駐流年

松

不改冰霜操凌寒翠色新可憐桃李樹回首路旁塵

獨坐看雪

垂簾深坐一身閒靜看沉煙起博山天上誰施修月手

霏霏玉屑滿人間

嚴姜

福建長泰縣人也

句

蒲葦初如絲磐石難轉移

福建通志嚴氏名姜長泰人失夫名年十一忽吟
曰蒲葦初如絲磐石難轉移父怪而問故答曰夢
中得之耳長歸王未幾夫得惡疾性暴甚嚴曲意
順之不爲忤夫卒哭七日縊死無子年二十三

錢鳳綸

字雲儀浙江錢塘縣人進士安侯之女也適同

邑黃子式序式序曾祖母顧太夫人以詩名鳳

綸能嗣其家學著有古香樓集散花灘集

茅應奎絮吳羹孫青時云與顧姒啟姬柴靜儀
季嫺林以寧亞清馮嫺又令張玉琴槎雲毛媿
安芳號蕉園
七子皆有集

毛際可古香樓集序畧余先銓部公與黃貞父
先生先後令鐘陵以清節相友而錢子安侯同

余戊戌成進士貞父先生之冢婦和知顧太夫人
人卧月軒集傳誦海內其曾孫婦雲儀錢夫人
復以詩聞夫人安侯同母女弟也歲癸亥安侯
墓木已拱其弟石臣過余請曰姊氏少工吟咏
積成卷軸今春秋四十矣同里梓其詩以繼卧
月而弁以先生之嘉言余曰夫人善持家政與
夫子式序相敬如賓其為五七言古及律絕體
沉雄妍秀各擅其勝而此事屬辭尤有合于風
人之旨嗚呼天之生材不易夫人既嗣音和知
而集中所與倡和者若柔嘉則夫人之姊若重
楣則夫人中表之妹以及馮柴林顧號稱女中
大家者莫不雲蒸霞蔚聚于一時豈虎林山川
之靈異名公鉅卿騷人墨客所不能盡者而畢萃於閨房之秀耶

見山樓墨話雲儀錢夫人詩筆高古脫盡巾幗
纖媚之氣所著古香樓詩決為可傳其射潮賦
墨君頌祭玉蘭文送愁文游湖心亭記皆高古
具八家筆力漫錄彤管箴一篇於此其自序云
古者后宮女史二人朝夕簪彤管隨王左右掌
后妃官室之事將以懲淫慝儆宮邪也揚雄作

二十五官箴而不及女史向疑其必有闕焉余
幼習姆訓長淹經傳竊知婦道一二遂欲仰宣
聖化內淑閨門女紅之暇綴辭補之若謂與子
雲茂先齊驅先後則吾豈敢其箴云煌煌憲章
昭茲來服崇勳攸載昔慝咸錄昔在周王動言
斯謹左右史臣既疏既引肅離令德王假有家
嬪御維賢女史無譁亦詳而法亦正而葩始於
宮闈浸及江漢惇俗媿行聖時幽贊迨其後嗣
淫荒以逞皦皦為汙而昏昏為醒主志既移女
德乃衰人之齊聖已或昵之碩人放廢顛倒以
嬉人之僉王已或比之揄狄再加婦功用隳善
善無寧遲疾惡不可長疾惡之甚是為妒媒取
默以容乃婦之期二儀既建動靜分磽磽者
拙猶猶者尊獨不見夫思媚之姒思齊之任藝
事用諫隸在尚書史
臣司鑒敢告屬車

冬日讌柴季嫻宅

星紀歲將徂天寒氣蕭滅百卉萎嚴霜零露晞朝日喜

揚芳集 卷二
逢素心人並坐芝蘭室笑語春風生雍容事文墨圖書
紛綺閣斐几陳琴瑟鳥散庭除靜雲披簾影黑幽居遠
鶯塵超然思曠逸流光迅擲梭良會恐易失旣醉發長
歌終始飽嘉德

迎燕曲

斜日繫春春寂寞美人罷繡開珠箔雙飛海燕翠羽新
一聲驚破梨花雲銀蟾老兔銜華屋花裙夜轉聲肅肅
緘書難寄玉門關征夫遠隔燕支山瀟湘不斷水潺湲
染空瑋瑁生曉烟

關山月

驚鳥啞啞啼不休征夫遠戍關山頭尺書頻寄秋復秋
深閨好女愁復愁涼蟾玉色當我樓團光濕露空悠悠
玉兔半昏冷湘篝金壺淒清咽更籌天河明滅橫斗牛
飛激冰輪使倒流續紛桂葉枝幽繆多結子花何處求
却憶城邊安石榴

美人梳頭歌

新林一聲啼綠鳥三十六宮春欲曉牀上輓轡牽素縷
秋水溶溶鏡光冷漸看紅日捲珠簾雙鸞却月眉纖纖
玉鳳斜飛鞞金蟬珮環搖搖曳湘烟下階獨自摘芳葢
櫻桃笑儂不結子

玉津園懷古

湯湯湖水鳴千古風翻雪浪蛟螭舞曾說鑿輿講射回
雕鞍千騎屯江滸笙歌曉簇鳳城雲旌旗暮捲龍山雨
遠渚秋風吹綠繁海棠飛作杜鵑魂舊日繁華今已矣
江村殘照清砧起重華宮中涼月明德壽殿前春草生
世事浮雲豈有定湖流嗚咽循荒城落日驚心凝望眼
不見紫雲南國晚

奉和母氏謁武侯祠

待謁先賢廟香臺薦白蘋鳥棲喬木古蟲蝕斷碑新石
陣迷荒霧金鸞降舞神指揮承漢統羽扇一綸巾

秋日簡亞清

城闌咫尺卽天涯惆悵離羣兩不知日暮涼風棋散後
夜深微雨雁歸時窻前橘柚垂多少檻外芙蓉發幾枝
同入清秋不同賞却憑青鳥寄相思

秋日憶長兄雪原客豫章

空庭月落漏遲遲猶憶同趨問寢時一自哀鴻催客夢
頻驚寒杵動離思霜凋樹色秋江冷風撼潮聲孤嶼危
遙望匡廬雲鬢鬢歸帆何日可能期

西窻寒詠

雨過芳花潤風來綠葉柔研硃讀周易更覺小窻幽

採蓮曲

芙蓉灼灼鬪紅妝雙槳中流蕩夕陽頻囑小姑輕笑語
莫教驚起宿鴛鴦

盡日輕風泛畫船波搖翠袖舞翩翾何緣花裏忘歸路
貪看湖心並蒂蓮

廖氏

名雪松江西奉新縣人夫亡守志

涼夜

月皎池光浮風淒蛩語咽課兒坐危樓挑燈劇愁絕

西江志廖氏名雪松奉新廖需女少淑慧通書史
適靖安生員許煒煒卒廖年二十六守節自課二

子慕芬慕芳勵行績學並饒於庠康熙四十七年督學楊顥題請旌表

葉招男

安徽婺源縣人提學副使葉份孫女適同郡詹

民先

句

雲山千古恨金石一生心

婺源縣志葉氏名招男雲莊提學副使份孫女慶
源詹民先妻也生而婉婉幼閑禮教一適詹門婦
道克修於高堂甘旨愛敬備具且勗夫力學以先
前烈民先因下帷發憤竟以羸卒時氏年甫三十
號慟幾絕妯娌再三慰諭乃勉視事哀毀如禮服
闋翁姑憐其無子而貧恐苦節難甘氏齧指出血
書於鏡臺有句云云翁知其不可奪遂成其志厥
後孝敬逾加凡遇疾病湯藥必親嘗饘粥必親進

蓋數十年如一日晚立叔子爲夫後撫
育如親生里人嘉其志成稱爲孝節云

謝氏

名秀孫字季蘭江西寧都州人適魏禧夫亡絕
粒而死

贛州府志謝氏寧都魏禧妻性婉婉喜讀書能
詩爲禧閨中良友禧客死儀真訃至謝號慟跌
仆泥塗中卽於是日
不食積至十三日死

自翠微山望金精

薄暮秋初風木葉下庭圃夫君招我遊盤爰出坡樹山
菊垂好花陰影隨行步幾折臨高厓歛足不敢顧夫君
指金精謂此汝所慕吳王洞口來仙女雲中舉至今千

百年烟霞生其處自憐長閨房荏苒秋草暮結廬十五
載不識金精路夜月明空山時聞鐘聲度憶我七八歲
曾一隨諸婦巾車到洞門嘿然生疑懼洞中忽有光雲
殿凌丹艷翠竹搖空寒白日蒙雨霧彷彿記曲水海棠
緣石戶草色映羅裙逐伴踏花去澗水溼弓鞋逡巡避
毋怒忽忽三十年仍向峯頭住世事幾興衰家門亦多
故徵蘭不可期弄瓦杳無與出戶淚如絲入戶淚如雨
人生能幾何年光如馳鶩安得辭人間酒埽侍仙馭

池上秋海棠

芳草依碧池佳花點秋石綠葉與紫莖何數秋蘭色主

人策杖行三徑偶相值采之置餅中顏色照几席有如
浣紗女斜立石潭側幽芳獨自憐忽遇五湖客沼吳果
何人撚花長太息

賦得弄花香滿衣

濃艷含芬曲檻邊
窈窕偶爾立蒼烟
清香暗襲羅衫透
舞蝶遊蜂已滿前

孫思姪

字文憲安徽桐城縣人適姚君山

哭夫子十首

選三

泪血斑斑漬總帷
展眉舊願已無期

夫子寄懷詩有處門唱答詩千首

兩平生未展眉之句斷腸默憶平生恨
三十年中苦別離

遊遍寰中興漸闌
何曾一日卸征鞍
長堤芳草年年綠
無復人歌行路難

避喧有願是幽居
壘石栽花俗累除
覓得一椽君不見
案頭惟剩手鈔書

范氏

浙江秀水縣人適魏塘計駿事父事翁姑皆以
孝稱夫亡翁姑相繼卒營葬畢自沉於溪

三月八日夜作自怨詩三首

舉目以四顧豈無同室人
同室各自謀難以烟幅申吁

嗟乎命之薄兮敢謂天心之不仁

心與口相語影與形相隨熒熒一嫠婦有力何能爲吁
嗟乎命之薄兮敢謂天道之無知

入亦復苦愁出亦復苦愁一朝獲死所此外夫何求吁
嗟乎涕交隕兮予魂魄長汎汎於中流

痛悼夫亡

傷哉薄命實堪憐夫死何如妾替捐本欲相隨同一處
只因姑在且捱年

哭太翁仙逝

少微星影落虛空驚化堂前白髮翁此去亡孫定相見

各霏清淚九原中

哭姑亡

幾年飲藥鎮含辛姑亦閨中一鮮民痛絕附棺兼附槨
獨留寡媳更無人

湯尹嫻

字洽君江蘇吳江縣人善天文歷律開方立方
籌算工丹青諸生三俊女適同邑計來來卒絕
粒以殉

悼亡

昔夜寒牀雙聽雪今夕秋牕獨愁月凝眸視我綺羅衣

掛方集 卷二 三
哀被霜花侵白骨

吳氏

適張某夫亡守節世次未詳詩由倪秀才一擊所寄

繡招魂旛詩

遙從人口訃音傳是是非非倍慘然血淚半枯誰共訴
肝腸寸斷自相憐人逾勸慰情逾切路益迢遙心益堅
但得靈輻歸故里好叅彌勒送殘年

驀然入夢便相憂借伴人歸語未周幾度風波幾度恨
一番磨折一番愁不辭瘴癘身偏往豈憚山河骨未收

綏綏神魂應不昧好隨旛影上歸舟

方月容

字素玉安徽歙縣人適祁門縣諸生謝天恩

吳珏古歙詩存方月容字素玉祁門縣諸生謝天恩妻也方為歙大族生而穎慧讀書工詩文有至性嘗兩到臂療父母疾以孝稱幼許字謝大父存仁歷官兵部尚書父庭椿出為從父相國存位後由口北道擢監團營軍母游氏封夫人晚居廣平甲申夫婦殉國難謝子身歸尋舊盟贅于方氏方兄繼貴忍人也誘妹改適陷謝逆案中幾斃極刑繼貴偽以凶問至方念有身不可驟死拔利刃剜出左目以矢無他已念兄驚忍即幸生男恐勿免適有鄰汪氏婦生女欲弗舉方免身生男密令保母向汪通其意許之潛以女易男去繼貴從外來發襦見女擲于地踐殺之方抱女尸慟幾絕私念兒幸得所天未忍絕思烈祀或異日兒歸有期作詩四章不

食死時順治甲午六月也年二十耳謝賴義僕
 劉子成控制府白其寃得釋歸十餘年繼貴以
 他見法謝後從保母得詩泣而和之又傳聞易
 嬰事心動釋其詩始悟鵲鳳實有指而言玉冰
 則析汪之合體也乃大慟哭覓兒歸問關萬里
 越數十年卒不得鬱鬱成疾以歿先是謝慮先
 澤斬然復娶婦生一子名善信痛母烈未揚父
 志未遂乞汪君子鼎為傳載新安女史徵今撮
 其大畧
 如此

絕命詩

平生摧折已多年至死從君不二天安得倩將青鳥去
 便劔丹血寫文牋

生憎骨月虎狼橫拚却良緣斷此生若使蒼天還有耳
 難聞午夜杜鵑聲

樊籠推翻一鸞單鷓鳳分飛顧影寒心逐玉冰君不見

何年回首月中看

君家志孝久相傳千古聲名志欲堅青史但能留白日

紅顏何惜掩黃泉

擷芳集卷之三目錄

節婦詩

古歛初葬汪啟淑選

陳氏 一首

章有湘 十九首

章有渭 五首

童氏 句

甯若生 五首

李氏 一首

葉宏湘 七首

趙氏 二首

馬生佩 四首

王慧 九首

溫慕貞 六首

溫廉貞 五首

褚氏 二首

孔繼瑛 六首

擷芳集卷之三

古歙訥菴汪啟淑選

陳氏

福建連江縣人黃金榜之室也

訣母

兒生半歲父沉舟母守孤貞備百憂孝養有兄兒已矣
從來忠孝不兼優

福建通志陳氏連江人夫黃金榜天折未有子翁
姑諭以祭奠需人不卽殉終制三年其母以身當
守節諭之氏曰母寡不死兄在抱也兒奚俟
哉遂作詩訣母云云對燭揮毫從容就縊

章有湘

字玉筐又字令儀號橘隱江蘇華亭縣人明羅

源知縣章簡次女適龍眠進士孫中麟振公有

湘女兄弟共五人咸通書史振公舉南宮五日

而歿有湘扇居一室長齋事佛嫺戚罕見其面

著有澄心堂詩望雲草再生集訴天雜記等書

安慶府志章氏雲間給事簡之女進士孫中麟繼室也克嫺內則秉性幽閒靜一曉詩書大義

相夫登賢書成進士及聞中麟卒於邸遂悲號投地引繩自經者再姑救之得不死會中麟柩

歸里章往迎之又經於輿侍婢覺又捽之為未亡人十七年事舅姑承歡盡禮從子曰璉立夫

祀撫孤茹荼長齋布服竟以悲號致病殞

龍眠風雅章有湘字玉筐又字令儀號橘隱華亭行取縣令章公簡之次女進士孫振公之繼

妻也女兄弟五人咸通書史幼時常背誦擣衣

篇長恨歌一字無譌父奇之隨宦遊閩中絮鹽

唱和流傳八閩乙酉父抗節殉城玉筐始歸振

公生子殤生女亦殤早夜佐讀刺繡其旁相莊

如賓振公舉南宮五日而歿玉筐捨地呼天絕

而復甦以有後勉為撫之扇居一室長齋事佛

嫺戚罕見其面所著澄心堂詩望雲草再生集

訴天雜記皆孤猿寡鵠自寫其憂傷哀怨之音

君子讀而悲其志焉

晚眺

嶺峻隱青猿松高飛白鶴山雲挂樹梢風捲殘英落新

蒲已抽芽細草媚崑壑景物最傷心桃李還如昨誰家

少女郎背立鞦韆索貌態衣不勝歡笑風前樂春來無

所為鬪草爭花萼何事深閨人終朝常寂寞

秋日寄家姊俞夫人

八月秋風振山谷黃花初放銀塘菊一枝手折欲贈君
 遠道茫茫愁極目聞將玉紙寫新詩新詩賦就動遠思
 蕭蕭鴻雁隨雲度寂寂虬燈擁漏遲憶昔同在翠微閣
 飛文聯句誇奇作那知江海各天涯青鳥無情雙寂寞
 蘇合房中愁索居尺素遙傳錦鯉魚為問江淹五色筆
 擬成團扇近何如

陳維崧婦人集雲間章玉筐名有湘龍眠孫進士
 名中麟婦也工才調常作詩寄姊云云亦何減唐
 人韓君平也玉筐著作有澄心堂集望雲集姊瑞
 麟妹玉璜並擅詩名妹迴瀾妹掌珠俱以文章顯

曉思

窻外雞初唱花間露未乾欲臨明鏡照猶怯翠眉寒宿
 鳥翻林樹歸鴻振羽翰不知鄉國信何日報平安

九日雨中有感

每到茱萸節思親淚滿衣難禁心耿耿况對雨霏霏故
 國秋萼老他鄉客夢稀登臨憐弟妹竟作彩雲飛

秋懷

露華寒夜滴柴扉留滯天涯未擬歸吳下雲深鴻雁杳
 楚江秋老鷓鴣飛穿針結縷人誰共咏絮吟風事已違
 聞道故園萼菜熟他鄉回首淚霑衣

次玉璜妹來韻

記得西窗剪燭時
鴿原回首忽天涯
夢魂不覺吳山遠
愁緒惟應夜月知
畫閣焚香春汎汎
繡簾飛燕晝遲遲
相期泖水歸寧日
重與殷勤話別離

哭夫子十首

一自公車去不還
從今信有望夫山
赤繩虛繫三生約
紅淚惟餘兩袖斑
訣別未親真恨事
夢魂時傍見懽顏
也知修短原無定
豈料榮枯頃刻間
千里良緣合倡隨
于歸不滿十年期
最傷薄命分鴛侶
猶幸高名占鳳池
故國泥封聞信日
長安春色看花時
無端遽赴修文召
不管空閨怨別離

日日傷心靜掩門
每因春草憶王孫
空閨形影那堪問

滿架圖書今尚存
十六年前靈谷夢
夫子讀書靈谷寺
夢謁帝有五日止

士之語三千里外杜鵑魂
孤燈厭聽梧桐雨
偏送愁聲漬

淚痕

父子夫妻總幻因
夫子先有鼓盆之感
又屢罹西河之痛夜臺相見可相

親無端生死偏摧我
不定功名却誤人
遺得文章驚四

海寄來錦字恰三旬
三月得泥金報
四月訃聞矣待乘雙鳳君先去

寂寞蘭閨未死身

幾度悲秋秋已闌
迴紋裁就向誰看
錦衾人去鴛鴦冷
銀蒜簾空翡翠寒
無復音容還故國
空餘旅櫬返長安

昨宵夢裏分明見依舊看花倚畫欄

遙憶牛衣相對悲那堪富貴便分離姓名始入黃金殿

麗藻終傳白雪詞淚灑在原當此日魂歸華表竟何時

孀閨寂寂腸應斷玉鏡臺空忍畫眉

銀漢霜華下井梧愁心曾耐夜啼烏月移妝閣侵書幌

風動形容出畫圖夫子臨別以寫照一幅示予咫尺相看言笑隔依

稀偏怪夢魂無舍情獨對芙蓉帳一任香銷金鵲爐

挑盡殘燈淚滿衣空階細雨正霏微愁凝長夜難成寐

夢到相逢不忍歸夢同夫子至雲間省母二人相對泣下人去依然同色

笑覺來何處覓庭幃悲涼此際還家日楓冷吳江一雁

飛

瘦影臨風憶所思冰心裂碎更誰知分棲怕覩連枝樹

續命空傳五色絲閣下招魂憐有弟墓前執紼痛無兒

閒來到處搜遺稿開篋篇篇黃絹辭

蜀魄啼鵑道路長鵲鴿無復雨連牀中郎事業書千卷

子敬人琴淚幾行不死丹心終化石餘生青鬢總成霜

與君不共齊眉案紙閣蘆簾瘞孟光

閨情

坐對鴛鴦草行看蛺蝶花那知春復夏遊子未還家

至日泊舟江上大風有懷

掛芙蓉 卷三
令節初逢起問程停橈還喜片帆輕旅魂欲到親幃側
一夜江聲夢不成

家園白牡丹

天風昨夜曳仙裙縹渺高臺一段雲好共海棠春睡足
不將濃艷嫁東君

章有渭

字玉璜知羅源縣章簡第三女適嘉定縣侯泓
與姊有湘並擅才名著有淑清遺草

練音續集章有渭字玉璜華亭人侯掌亭泓之
室幼卽長齋信內典善詞翰于歸後以上谷多
難夫婦遁迹偕隱有桓鮑風旣而仍還故里相
保於敗巢破卵之餘者皆氏力也有燕喜樓草

行園

爛漫花如繡閑行碧沼邊浴鳧還泛泛舞蝶自躑躑羅
袂香風襲紗窻翠篠連徘徊看落日彩霧絢青天

春感

舞蝶莊生夢啼鶻蜀帝魂紫芝逢勝友芳草想王孫小
閣聞雞唱閒庭聽鳥喧曉煙迷麥隴香霧鎖柴門魚戲
青萍動風吹碧葉翻綵毫題玉柱綠蟻引金尊乍摘葳
蕤草長依翡翠軒避秦無絕境何必問桃源

舟行卽事

曉霧迷離彩鷁輕掉歌徐動見秋晴臨湍鷺子亭亭立

夾岸蒲花漫漫生遙指小山遮塔影忽經深樹出鐘聲
晚涼不覺羅衣薄自愛澄河片月明

懷瑞麟姊

一聲啼鳩覺春闌懷舊離魂不自寬猶憶繡牀人病起
殷勤頻為囑加餐

再懷玉筐

臨別殷勤置酒盃西風揮手畫船開春來苦雨音書滯
幾度聞簫憶鳳臺

童氏

浙江平陽縣人朱彥士妻也

句

夫君早歲赴黃泉薄命完真四十年

平陽縣志朱彥士妻童氏年二十二歲夫亡事姑
盡孝撫孤口授經書頗知吟咏病篤有句云云

甯若生

字璫如江蘇吳江縣人大理寺評事繩武之女
孫也適嘉定太學生侯沆著有春暉詩草

練音續集甯若生字璫如壬午副榜侯沆繼室
少與李氏名蒞生者為閨閣友日課詩文迨歸
上谷妯娌相賡酬或討論經
史氏最稱淹貫有春暉詩草

松陵行

松陵濱具區澤國水淼淼桑海已三變平蕪愁遠眺余

初尚齟齬嬉嬉膝前繞姊妹亦齊肩相呼梨與棗甲第
城西偏飛革驚高鳥玳梁乳雙燕拂羽依井藻處巢安
知外寧識秋風早無何陡失怙依依集于蓼有女愧中
郎緒言委伯道母氏獨懷霜制淚傷孤藐余未脫提攜
小妹復懷抱堂前跬步間歎息音容悄泣露花垂簷臨
風葉未掃少長髮覆眉春蠶手自繰素絲無端委焉得
成魯縞觸緒思因煩治夢心如擣誰知機中斷宵永漠
難曉雙親閉靈幃遺訓忽已杳寂寂塵空閨搖搖揚丹
旒死者不復生生者猶尚小人或利所有匍匐爭傾倒
我寒妹啼饑日夕不自保垂涕循几筵含聲奠清醪倏
忽各分散庭背荒葭草崑陽有舅氏憐余甫窈窕珍重
掌中珠有心不敢標及歸逾廿年何處瞻華表庭榭已
榛蕪坐愁使人老松楸吳山隈荒堆沒蓬葆回首怨潮
生余懷方浩渺

六姊章玉璜于歸次韻索和

秦樓日暖鳳簫吹聲叶于飛之子宜母氏結褵連理帶
夫君催賦合歡詩雙移彩鷁來銀漢並坐文鴛映碧池
喜溢門楣多樂事大家風範是吾師

稽公忠節動穹廬繡閣爭誇謝蘊如龍起早傳遺愛頌
雞鳴還問復仇書紅蕉一卷春生夢綠綺初調月滿裾

腹笥五車兼百兩敢邀白雪當瓊琚

尊人為羅源令殉節

和荆隱悼亡

燕喜雲和憶舊蹤芳年行樂太匆匆聞香簾幙琴書靜
得月樓臺笑語通人並玉壺邱壑裏才分綵筆黛螺中
祇餘華表魂歸去夜夜星辰夜夜風

同荆隱集玉璜閨中次韻感懷

十年往事不堪論憑仗清樽減淚痕獨有雲和樓上月
天涯還照幾人存

李氏

廣東廣州人

絕命詞

恨絕當時步不前追隨夫婿越江邊雙雙共入桃花水
化作鴛鴦亦是仙

新語林氏者廣州之河南鄉人丙戌城破林氏投
珠江而死番禺羅賓王弔之有日黃泉隨母逝白
璧為夫全抱玉雲飄海沉珠月在淵又李氏者番
禺三元市人庚寅廣州被圍朔騎抄掠得之不辱
賦詩十章而縊味其辭其夫必先自沉者又有玉
桂卿者廣州人為張叅戎之妾丙戌年始二十兵
至拜辭其夫彈琵琶一曲自經死鄰湛若弔之有
日墜樓未散香烟夢披髮猶存石鼓歌雁柱只今
餘玳甲為憐
落木晚風多
廣東通志李氏庚寅為步兵所掠賦詩三十章而
縊有詩云云

葉宏湘

字書城江蘇崑山縣人進士葉宏綬之女也適

嘉定諸生闕宗寬年未三十即寡壽至八十三

而卒著有繡餘草

崑山新陽合志庠生闕宗寬妻葉氏名宏湘字書城幼聰敏端淑博覽工詩詞歸宗寬年二十九夫亡撫嗣子守節年八十三卒著有繡餘詩詞草若干卷行世妹燦英適衍聖公孔毓圻蘭谷適胡秩亭

並工詞翰國朝練音初集葉宏湘字書城號曉菴崑山葉氏幼即為詩尤嗜填詞長適膠定庠闕宗寬為進士選孫婦家於膠邑氏年未三十而寡又無子每當孤燈夜雨形影相弔悉發於詩詞有繡餘草

余起霞繡餘草序庠生闕宗寬妻葉氏名宏湘字書城幼聰敏端淑博覽工詩詞歸宗寬年二

十九夫亡撫嗣子守節年八十三卒著有繡餘詞草若干卷行世妹燦英適衍聖公孔毓圻蘭

谷適胡秩亭

並工詞翰見山樓墨話閨秀葉宏湘字書城善詩古文亦工倚聲有寄外蝶戀花調甚佳其詞云滿院秋陰寒料峭不捲湘簾花影紛紛裊望斷鱗鴻空自惱所嗟夢不由人好夢若由人隨處到化蝶何妨夜夜君前繞豈怕陽鳥催曙早只愁夢斷秦淮杳

織女歎

有女終朝織微微聞歎息舊絲織為端新絲未盈疋永夜銀缸懸曲房還邀明月照流黃天寒手凍絲轉亂絡緯聲聲泣夜長辛苦織成機上錦不知誰作嫁衣裳

秋曉曲

金風驚醒芙蓉睡，枝枝衰露垂。紅淚促織聲遲，玉漏長
梧葉輕翻，落寒翠曙色。臨窻璧月低，玉人秋倦，惱鄰雞
暗回紫塞。懷人夢強坐銀牀，對鏡啼種藕橫塘。墜粉絕
小山叢桂香空咽。最喜瑤階秋海棠，宿花到有雙蝴蝶。
次韻答侯思谷見懷

上茹夫人十二韻

千古人文藪，無如越地偏。湖山鍾間氣，閨閣誕名賢。嬌
面天桃妬，纖腰弱柳憐。甘爲黃卷蠹，恥鬪綠雲蟬。讀史
藜然杖窮經，韋絕編縹緗。書架滿翡翠，筆牀聯字製簪
花。格詩吟咏絮，篇閒來還潑墨。靜裡更調弦，鴻案春風
繞龍池。翟第傳邀人，理玉佩不自貼金鈿。豈止蘭房秀
真同桂殿仙，謬承葑菲採草草達妝前。

春日過表妹村莊賦贈

編竹爲籬屋結茅，愛耽野趣遠塵囂。窻臨曲澗看鷗浴，
戶捲疎簾讓燕巢。柳妬纖腰枝更瘦，桃偷粉靨色偏饒。
扁舟相訪茶剛熟，互把新詩仔細敲。

卽事

楊柳飄綿撲短牆，穿花鶯燕共銜香。江南三月春如此，

不是愁人也斷腸

寶篆拈來懶更薰為憐花落思紛紛日斜愁向欄前立

無限春光送夕曛

趙氏

漢軍

旗人自號殘夢主人平樂太守佟鏞

之配也

祭竈

再拜東厨司命神聊將清水餞行尊年年破屋多塵土

須恕夫亡子幼人

蓮坡詩話平樂太守佟鏞妻趙恭人早寡依兄公
鉉僑居天津鞠子濬成進士生平作詩最富不輕

示人而絕無脂粉之態其祭竈詩云云又題邊塞
圖詩云云二絕為世傳誦所居曰殘夢樓因號殘

夢主人

題邊塞圖

黃沙漠漠迥無垠萬古關河不度春今見畫圖腸欲斷

可知當日戍邊人

馬生佩

安徽桐城縣人適姚某無子青年夫故志矢栢

舟惜詩不多見

東臯作

秋風何處來秋色至於此我來秋院中坐看秋池水院

中寬且閒池水清且瀾不知秋可悲但覺秋可喜曰秋
曰秋秋九月秋兮秋兮秋十里

祀竈

擗管忽如痴醉心只自知境窮無處訴命薄望神司白
水三杯潔清香一炷遲莫嫌儀太薄夫死又無兒

貧家婦

辛苦貧家婦雙眉不敢顰終年事機織裙布不遮身

哭夫

風風雨雨薄羅衣如醉如痴是耶非最是無情閨燕子
雙雙梁上去來飛

王慧

字蘭韞江蘇太倉州人學使王長源長女兒妹
七人皆能文辭風雅萃於一門可謂極盛適琴

川朱方來著有凝翠樓集

蘇州府志朱雲集妻王慧字蘭韞太倉人乙未
進士發祥女丙辰進士吉武姊讀書秉禮早喪
所天簾櫳深掩所著凝翠集不示外人
年至七十餘吉武見之乃付梓行世

池北偶談王慧字蘭韞太倉人同年長源督學
發祥之女有雋才所著凝翠軒詩一卷極多佳
句閨詞云輕寒薄暖暮春小立閒庭待燕還
一縷柳花飛不盡和風搭在繡牀前又五言如

杏花都揜屋楊柳半垂溪花陰依略約竹色捲
瀟湘風懷看綠柳愁緒比黃楊紈扇三春月細
琴五夜霜七言如別去新篁方解籜重來芳樹
欲過頭蕭蕭竹影遮紅藥細細波紋映白魚纔

過輕雷收筍旋斲新水試茶芽一枝香供宜
 金屋半醉紅扶待畫叉鶯粟花楊柳溪橋初過
 雨杏花樓閣半藏煙淚淹紅袖傷離日愁在黃
 昏細雨中疎添小印思題扇釧劈輕羅憶點籌
 牆角紅殘桃結子石盆清淺菊分芽柳絮飛殘
 青滿徑豆花零亂綠圍村棠梨謝後猶花信櫻
 笋過時已麥秋幾處溪山留薜荔一秋風雨在
 芭蕉皆佳句也又宿田家偶見粘牕破紙乃韓
 偓香奩詩惜而賦絕句云麗情佳句有誰知瞥
 見窻前字半欹為惜風流埋沒甚自攜紅燭拂
 蛛絲此等懷抱亦
 非尋常閨閣所解

國朝詩別裁集蘭韞一門風雅得所承受故其
 詩清疎朗潔其品最上王漁洋祇賞其一縷柳
 花飛不定和風搭在繡牀
 前猶以尋常閨閣待之也

花下讌集

城南落日綠滿田柴門恰與青蕪連歸霞返照霽景鮮

丹楓黃菊相爭妍主人擁榻愁難眠坐對古樹吟秋蟬
 桂屋風來影亂翻恍如瓊宇逢癯仙笑傾美酒雙玉船
 數枝清香拂几筵捲簾試向金鈎懸起看皎月來窻前
 侍兒花底調冰弦一彈再鼓聲綿綿露寒墮藥粘珠鈿
 人面恰可欺紅蓮更長燭滅兔魄圓花露冪冪輕於烟
 却思分韻擘錦箋揮毫落紙孰後先醉筆模糊醉語傳
 嫦娥應笑人如癩急吹活火分新泉博爐石鈔親烹煎
 夜涼風露且莫旋來朝擬復到花邊

端午日再晤羽鄉見贈長句賦酬

蕤賓時屆天中節競渡鳧車亂如雪畫舫簾開粉面紅

輕紗艾虎香風熱君家何事獨耽幽花竹蕭疎淨若秋
書窻點綴新時景自汲清泉插火榴我亦村居了無事
挈伴探奇過橋去萬綠叢中一徑微柴門斜掩藤花墜
扣關喜見主人迎一笑風前最有情旋撥竹爐吹活火
石鈔泉響松風鳴開函更出新詩句字字珠璣散花雨
林下芳名獨擅奇閨中錦字應輸步皓如冰雪燦如花
自是仙家綠萼華吸露餐雲清可掬定由詩骨帶煙霞
慚予鄙陋何堪錄反辱驪珠引魚目久已低眉拜後塵
從茲不敢汗箋牘日色斜銜欲別難一番微雨弄輕寒
歸來燈下重開卷添得爐香仔細看藏拙恐違知己意

續貂又愧心先醉強將蕪語達幽情嘲笑從君無所避

冷泉亭

泉聲檐檻外林壑杳然深人世熱何處我來清到心松
林藏日色潭底臥峯陰一自樂天記山光寒至今

夏日題所居

銷夏渾無事柴門盡日關倦拋書卷臥閒把藥畦刪綠
借鄰家樹青分郭外山蕭疎遺俗慮差可適真頑

三月十五日同二弟泊舟澗橋二十韻

山嵐浮暮靄野水漾晴坡帆趁斜風便舟移遠岸迤杏
花都掩屋楊柳半垂河霧氣連峯頂煙光繞澗阿粉香

沾草木金碧耀藤蘿翠幕茶寮煖紅欄酒旆多燈圍珠
錯落屏簇錦盤佗汗細揮紈扇塵輕曳綺羅靚妝俱粉
靨掃黛盡青蛾溪女籃輿載吳姬細馬馱盈盈堪妬影
的的會凌波挂紙聊停石攜壺好藉莎有心逐遊冶何
意向檀那水面星橋滿山腰月駕過長堤人似蟻畫舫
酒如鵝檀板低聲緩瑤箏促調和佳人傳軟語狂客發
清歌煖氣妨花醉喧聲混曲訛扣舷還欲和欹枕旋聞
訶輸與垂綸叟滄江臥綠蓑

禹陵

明德彌蒼昊神功邁大庭懷襄方盡力胼胝極勞形草

木開蒙昧龍蛇滌穢腥鑄金九土貢誌怪八方經蒼水
先呈簡防風後至刑相傳弓劍棄此地隧泉扃三古遺
祠廟千秋共薦馨壁牲前代典碑版列朝銘深殿從羣
后空山走百靈舊聞雲罕駐今見翠華停心法傳河洛
天章煥日星殊恩沾後裔異數出彤廷肅穆瞻新像登
臨泊小舫城垣辭鏤琢戶牖炯丹青莫覓藏書穴徒看
窆石亭蘿長巖竄跡松老鶴修翎衆水環襟帶諸峯列
嶂屏橋山同故事寂寞對秋坳

移居茜里舊宅

新塘一水繞街東舊是柴桑五畝宮松菊尚存思祖德

蓬蒿不剪見家風
花深雞犬疎籬外
潮落魚鰕小市中
却愛堂前雙燕子
還尋故壘入簾櫳

芝塘候潮因憶亡女

水淺舟膠日半斜
扣舷閒望似天涯
煙深竹塢鳩呼雨
潮落蘆根蟹聚沙
愁緒縈纏同蔓草
年華衰謝感殘花
劇憐弱女常同泊
相對蓬牕數晚鴉

閨詞

輕寒薄暖暮春天
小立閒庭待燕還
一縷柳花飛不定
和風搭在繡牀前

溫慕貞

浙江烏程縣人適朱時發結褵三載時發卽世

矢志栢舟著有隱硯樓詩

錢鳴泰隱硯樓詩序吾里溫孺人適表內兄時發朱君女弟適王氏兩孺人素以詩名皆少喪所天零丁孤苦依母氏爲命子於溫氏有葭誼先後延兩孺人訓課吾妹及女輩壺範淑儀知之備悉然兩孺人苦節異常行道聞之曷勝酸鼻况予得之親睫者今集中所載諸詩兩孺人不得已自道其奇窮之况原不必有意求其詩之工拙也

溫廉貞隱硯樓詩跋胞姊溫孺人時發朱君之淑配生而靜慧動必以禮稍長遵姆教讀書通大義年十九歸朱君偕朱君事翁姑深得歡心太孺人性嚴峻子婦侍側不敢出一語姊奉養左右不失意指一味之甘必奉堂上結褵甫三載朱君卽世姊慟不欲生願相隨地下得兩尊人勸慰而止爾時垂白之親在堂黃口之孤在抱家無負郭復鮮伯叔惟辛勤紡績以供菽水

迨翁姑前後歿姊則百計綢繆殯葬如禮杼軸
 之旁設書案課子使無隳先人業吾母年高因
 依母氏其事吾母一如事姑卽氏之飲食教誨
 亦藉姊力時雲翔三兄尙未娶姊爲經營完娶
 此又賢而才也乾隆三十一年姊年六十有四
 擬援例請旌因有事粵西依永康牧眷屬赴
 任乃以勞瘁過甚一旦病疴不起歿於客途其
 事遂寢甥曾三又自傷坎壈不克顯揚其親私
 竊抱恨因出姊生前所咏三十餘首囑氏陳詞
 氏慮朱氏姊一生節孝艱苦備嘗久而漸泯故
 畧言其梗概俾甥持此
 以爲請旌之有徵也

孤鴈

楓林紅葉落月暈有微茫古寺鐘聲遠飛泉水氣涼朝
 鴉隨日影孤鴈帶秋霜牧笛無腔調偏能引恨長

秋海棠

經秋芳樹已先凋惟有仙葩異樣嬌清露時承魂欲睡
 晚霞纔照色偏天離愁此日腸堪斷別恨於今淚未消
 一段柔情渾是醉隔簾紅粉好相招

三過宋氏園三首

殘花搖曳一簾風幾點莓苔襯落紅最愛壁間圖畫好
 平臺棧道與山同

雨餘風細送春寒柳絮球飛小鳳團更有茶蘼花似錦
 一庭鶯粟映西欄

綠陰澹澹繞庭前最喜桃源近早船閒坐桂軒頻悵望
 碧池初透小荷錢

寄弟

骨肉相離已卅年家鄉迢遞隔山川寄言吾弟須歸早
免使慈幃望眼穿

溫廉貞

慕貞之妹也適長興王靜甫無子矢志守節竭
蹶葬姑與夫著有隱硯樓詩

硯隱樓詩自序氏產自烏程之七里鄉年二十
三適長興王公遯洄三子靜甫為室纔三載夫
歿氏痛不欲生父母過而曲諭曰汝殉節良是
其如爾姑在堂爾夫未葬何氏遂飲血吞聲冀
有以殫婦職越一載竭屢措置葬夫於藝香山
麓姑年老氏苦力綿愧未能先意承志迨於乾
隆八年姑歿氏隨經營馬鬣附葬於五畝膳田
之內惟時父故母年逾七十雖上有三兄均遠

幕不得已隨母赴天津奔西粵於龍言天柱兩
兄處謀膳資庶奉養稍可支給庚申冬自粵歸
湖旋里日展舅姑墓畢念父櫬於乾隆五年浮
厝曾祖先太傅墓傍傾圮不堪言狀氏哀號泣
血卽於厝地而營葬焉氏乃歸母於七里鄉之
故宅母耄而多病行住坐臥不克自主氏扶持
不離左右俟母百年後誓相從地下以生不能
奉菽水於舅姑父母冀於死之日畢之有里言
數十首詩不成章聊遣傷懷耳因
朱甥曾三刊伊母詩囑合訂焉

梅花篇

梅花瘦楊花肥梅花羞逐楊花飛不是梅花多傲冷本
來情性自相宜春風寒峭香寂寞漫山桃李紛紛落黃
鸝莫再罵春風人情還比春風薄

小江道中

極目春田外離離麥正肥新帘邀過客嫩柳趁斜暉遠
寺鐘聲細幽溪水浪微推篷閒望處雛鳥傍林飛

秋蟲

門掩寒林落葉遲閒聽唧唧不勝悲高低自譜無絃調
斷續如含飲恨思孤館酒醒霜月夜荒園人靜夕陽時
可憐無限傷心事著意鳴秋秋不知

過常玉山

常玉山前路逶迤歸輿已過草坪司蕭蕭疎竹通幽徑
漠漠殘花護短籬田畔蛙聲喧雨後澗邊桐葉報秋遲
回思南北傷心事孤鴈渾疑助我悲

灘河風阻

春江寥濶景蕭然風阻山邊繫客船灘勢自流三月暮
斜陽欲汲一溪烟

褚氏

江蘇長洲縣人張世恒妻也

臨終詩

待死光陰日抵年關心菽水百憂煎高旻不改蒼蒼色
獨有寒門墜却天
破鏡歌殘夢亦愁此身久已現浮漚黃泉有路津休問
收拾歸裝趁栢舟

昭文縣志張世恒妻褚氏二十夫亡
守節秉禮通書史其臨終詩云云

孔繼瑛

字瑤圃浙江桐鄉縣人適同邑贈中憲大夫沈
廷先卽山東河庫道啟震之太夫人也 誥封

太恭人善書工畫著有 集

沈觀察啟震孔太恭人行略太恭人姓孔氏名
繼瑛字瑤圃外祖景修公諱傳志邑庠生外祖
母施太孺人生六人吾母居其長甲寅先大夫
補弟子員丙辰始就婚於外伯祖之家丁巳太
恭人有身先曾祖妣張太安人率先大夫乃偕
太恭人攜一婢歸于家甫入門卽操井臼衣布
茹蔬安之若素先大夫遠客在外每日黎明必
促震起令入學晚歸輒問一日中所習業夜率
小婢終夜紡織而令震坐於側是以寄先大夫
家信中有云窗下看兒談魯論燈前教婢揀吳

棉又云夜枕先愁明日米朝寒又典過冬衣皆
當時實事也不孝年十五隨先大夫之蘇州王
申太恭人哭外祖母于嘉興時堂舅理如公相
繼而卒因有愛女因憐婿思親更哭兄之句不
孝先在嘉興舅氏家課諸表姪復至竹林高姨
母家課兩表弟太恭人因與姨母詩筒往來離
別之感見於楮墨時外祖姑馮太夫人就養入
都太恭人賦詩寄訊和詩云人憐瓊樹雙枝秀
詩到梧桐一葉飛蓋風雅之盈於一門者如此
乙酉震應 召試蒙 恩賜綺震爲先大夫暨
太恭人製衣各一太恭人有詩云賜錦初披新
樣紫遺氈莫忘舊時青癸巳太恭人病先大夫
寒疾陡作易簣時太恭人一慟幾絕哭詩云甘
回蔗境亦何曾卅八年來感廢興七品頭銜添
白髮一編手澤共青燈醫從隔歲求無益命入
殘冬續未能風雨南窗追往事偷生此際獨沾
膺去年我病君還病今日君亡我未亡半世窮
愁全不減一生離別此尤長貧依八口留京邸
夢逐孤兒返故鄉最恨同來不同往潞河煙柳
劇淒涼痛哉斯篇不忍終讀也惟時先大夫靈

櫬尚寓京師於是泣示不孝以詩曰旋櫬倘能
歸故土殘生聊復度今年不孝既送父柩南歸
吾弟應留侍母側方躊躇間而太恭人手書適
至寓詩有云看雲南北存亡隔踏雪東西去住
難又手示不孝以寄南中諸女伴或以故物或
隨住他所其現處故鄉而為吾極關念者惟族
嬪楊孺人徐姊夏妹及勞氏嫂朱氏弟婦而已
因寄詩各一章系以短序其略曰余自庚寅歲
就養入都甫四歷寒暑旋抱未亡之痛近復以
孤兒負米僑寓北平地是盧龍人同旅鴈記兒
時與諸姊妹讀長城塞下諸篇輒感慨係之不
謂頽齡竟來茲土重以素衣欲別丹旆將歸愁
緒萬端夢魂千里每下他鄉之淚誰憐失路之
人感昔悲今得詩五首嗚呼太恭人濡筆之時
動關至性震讀之至今不敢忘也一夕謂震曰
憶昔庚寅歲出門時吾二人與汝兄弟夫婦皆
無恙聚首甚懽今六人之中已去其三能保其
更無他故乎因口占以示云六親存已半三偶
變為奇到此不歸去寧無及我時嗚呼太恭人
明察幾先已若逆料今日之事復云同鎮至親

中惟三舅母一人為吾老伴歸時當數與
往還并有歸裝聊自檢老淚向誰彈之語
小粉場雜識青齋沈觀察啟震母孔瑤圃太恭
人諸姊妹皆能詩而瑤圃集聞尤富惜未得一
讀頃從其內親扇頭見題訪真集調寄如夢令
詞云凝眺無邊雲岫訪个真仙難遣消得竹林
閒甘與梅花同瘦知否知否添個香山老友又
感賦調寄菩薩蠻詞云長安永別愁雲結小祥
塞上驚飛雪六管動葭灰陽回人不回三遷來
歷下已足是週年也哀慟憶家鄉孤兒獨捧觴

梅花

雅澹偏宜雪橫斜合有詩月明清夢遠風冷暗香遲庾
嶺春先占秦樓笛謾吹江南空有信不解寄相思

震兒設教永平移家就養途中即事有作

有子悲風木饑驅到北平移家聊遠道就食悵餘生載

主親封篋棲神宛倚衡同車頻險阻共命判幽明渡水
潛相喚登山恐或驚崎嶇輪易折殼棘馬難行攬袖看
孫哭烹茶有婦迎爲言官道近齊說郡侯清地繞岡巒
勢人多絃誦聲疎花開小院斜日下高城聚似萍波汎
來當麥浪晴黃泉誰問路白髮獨添莖每憶黔婁被徒
憐考叔羹蕭條愁客館何日送歸旌

遊大明湖

大明湖景似蘇隄也向熏風策杖藜歷下亭環流水曲
會波樓遠遠山齊香飄花浦蓮初放歌入蘆洲舫又迷
一抹烟雲催夕照回看月掛柳稍西

述懷

漁樵圖畫已難全每念清門一愴然少日嗟君違鯉訓
經年別我寄鴻箋諸生執業吳山久三鳳蜚聲雪水傳
祇藉殘書消白日更無長物伴青氈硯田已熟寧多望
室磬常懸不受憐修德漫期身食報傳經惟最子承先
天書乍捧雲霄裏祖德還陳考妣前已喜頭銜封二
代便看日暝赴重泉年符義畫纔過一路隔燕臺悵幾
千歸計未成雙淚湧感今追昔紀長篇

章夫人見惠蘭花

空谷猗猗香自幽曉粧偏稱玉搔頭一枝相贈消煩暑

坐對南窗靜似秋

熏風無那日偏長吟重分來九畹香
向膽餅清午夢

幽芬滿室簾紋涼

擷芳集卷之三終

擷芳集卷之四目錄

節婦詩

古歛訥菴汪啟淑選

姚鳳儀 八首

曹氏 一首

曾如蘭 一首

汪氏 一首

龔淑貞 一首

董文 一首

陳克毅 五首

劉氏 句

徐德音 七首

袁潔 二首

張湘文 二首

李氏 一首

孔麗貞 四首

趙氏 三首

陳齊宋 句

孫淑 一首

張佩華 二首

曹氏 六首

劉文貞 句

張藻 八首

擷芳集卷之四

古歛訥菴汪啓淑選

姚鳳儀

安徽桐城縣人樞部戊生長女適諸生方

于宣著有蕙綢閣詩集

龍眠風雅姚氏鳳儀樞部戊生公之長女諸生方于宣之妻也所著有蕙綢閣詩集方維儀蕙綢閣詩集序吾姪女幼而敏慧隨宦澱水輒效謝庭韻事適吾宗遂高益覃心風雅生一子二女不幸遂高早世女年甫廿一其境愈苦其節愈堅其詩亦愈工不意癸卯冬又棄我而逝傳其詩正所以傳其節耳

丁酉仲秋曾祜十歲初度予歡甚回思夫子去世

掛芳集 卷四
兒在襁褓中撫稚之難有誰憐惻諄諄示汝讀書成名不負孀母之艱辛偶成一章用誌勉策
有子有子名曾祐歲纔踰周已失怙襁褓之時多疾患
輟寢忘餐倍荼苦卜居截髮敢言貧侍側時教中規矩
熒熒弱質掌上看阿母百事盡艱難天寒視衣飢視食
飲冰茹蘗耐霜寒今汝十齡喜及肩凝眸待著祖生鞭
新秋雙桂當筵吐祈爾繩繩望爾賢

初月

新月如弓曲含輝渾著霜微微臨小檻宛宛過前廊桂
魄搖初影銀河漾淡光移時雖漸落流照亦何長

孤鴻曲

夜靜蟲吟寂開簾見爾飛數聲和漏永隻影共星稀塞
外霜風勁天邊列宿微可憐同此恨輾轉淚霑衣

秋月

夜半階前似有霜閒看秋色轉蒼茫金波宛宛臨朱戶
玉樹依依上畫堂露濕青苔侵砌潤風吹黃菊滿籬香
清光偏照羅幃冷倚徧欄干子夜長

九日憶夫子

去年令節君同去今日登臨我斷腸野色宜人添悵望
秋山如畫總淒涼征鴻塞外全無信叢菊籬邊初有香

和淚題詩君不見千峯忽忽又斜陽

春日遣懷

空階小樹漸垂陰旭日初融嵐氣侵半捲珠簾人寂寂
斜薰寶篆晝沉沉三眠楊柳舒新翠百轉流鶯報好音
春到更添愁與病憑欄不覺淚盈襟

上元前二日祐兒讀書二兄竹笑軒作此勉之

王正淑氣正新鮮好鳥關關韻似絃柳意知春條漸綠
梅花趁暖色偏妍雞窻燈火休虛夜鵬路風雲定有年
莫道一貧無長物青箱舊業有家傳

河邊新柳

青青柳色拂河濱千縷長條日日新輕掠波紋浮水面
風來亂挽釣魚人

曹氏

浙江海寧州人諸生曹穎洙女適同邑唐之坦
于歸六載之坦病氏奉湯藥衣不解帶者半年
洎病革氏欲殉咸為家人所救後卒投繯時康
熙十六年事也邑令許為具詳得建坊旌表

海寧縣志曹氏諸生曹穎洙女唐之坦妻之坦
疾亟氏預治殮具夫將死即不食母強之食比
夫死取向所蓄砒霜服之不得死更啜灰水又
不死次日取錢吞之又死夫既殮中夜服瀉
忽大吐終不得死乃大慟絕食二十日而猶
不死夜半啟戶出投舍旁池中家人覺救之氣

絕復甦於是復飲食操作如故尋剪其機軸製
 衣一襲時庭中蠟梅方開婦視而歎曰昔董節
 婦有菊花詩美其不落也此花亦不落因為詩
 云云夜夢其夫邀之曰百日為期時十二月望
 也歲除內外空僚失婦所在行視柩前麻衣纍
 然懸幌在梁矣邑令許三禮親詣其問姚江黃
 宗義為
 作志銘

黃宗義唐烈婦曹氏墓誌銘烈婦曹氏諸生穎
 洙之女海寧之翟墩里人年十九歸同邑唐之
 坦之坦之父煥亦諸生也歸六年而之坦病烈
 婦悉賣其簪環裝奩以佐醫藥衣不解帶者半
 載疾革謂其夫曰君死我不獨生乃營砒霜以
 待丙辰歲九月二十八日之坦卒烈婦治喪衣
 衾必有副家人阻之不得因斥去其砒霜烈婦
 瀝桑灰為汁飲之腹痛而不死明日夫將殮恐
 死之不及是時也碎錢為屑吞以速之又死
 夫既殮而防之者愈密烈婦曰頃欲與夫同殮
 既失此期何日不可死而必以今夜乎家人信
 之人定烈婦潛起飲滴升餘號呼宛轉毒裂經

時復吐下而解烈婦曰我求死不得計惟有絕
 食耳不食二十日而容貌如故神理燭然夜
 半啟戶出投於旁舍池中久之而家人始覺出
 之池已死覆以衾而復活烈婦謂其舅姑及母
 曰大人非愛我徒苦我也我志已決遲速總一
 死耳於是復飲食起而操作如常尋剪其機軸
 製衣一稱餘布七尺有小婢乞之不與家人竊
 議曰尺布尚惜其不死明矣其時庭中蠟梅方
 開烈婦視而嘆曰昔董節婦有菊花詩美其不
 落也此花亦不落吾試咏之云云十二月望起
 而嚴妝於天地影堂靈座舅姑舅之姊各設四
 拜曰婦從此別矣孝養之願以俟來生家人皆
 哀慟烈婦從容自若從此又不食除夕得間取
 其七尺之餘布自縊夫柩之旁始知不與小婢
 之故也及殮瞑目口闔不同乎世之為縊者此
 固獨行其願之一徵矣年二十五許邑侯詣廬
 祭之聚觀者數千人
 莫不為之嘆息泣下

詠蠟梅

添得冰霜枝葉無此花自與衆花殊共知秋菊貞心在
尚有黃梅抱樹枯

曾如蘭

福建長樂縣人曾子駿之女也適錢塘林邦基
邦基病危許以身殉洎歿仍奉舅姑三載後舅
姑卒如蘭絕粒而死

錢塘縣志曾氏林邦基妻年二十一歸林善事
高堂克襄中饋林忽染危症醫禱莫效彌留之
際若猶有待者氏知之許必以身殉目遂瞑既
歿停棺氏曰虛其右以待我鄰里以其事聞於
邑令邑令某勸慰再三并頒粟帛婦含痛任事
亡何舅姑相繼死附身附棺一切皆經紀周備
忽自念曰永訣一言尚何待耶遂絕不食者十
四日而卒年三十有六時當酷暑玉質如生先

是氏嘗鑿金十餘粒置懷袖間以備倉卒蓋矢
志若此鄰孀顏氏以貧乏將改適氏曉以禮義
教以女紅卒無他志

絕命詩

鏡裡菱花冷三年淚未乾已終姑舅老復咽雪霜寒我
自歸家去人休作烈看西陵松柏下夫子共盤桓

柳亭詩話長樂曾如蘭適同邑林邦基寄籍武林
癸未夏邦基以哭母得疾死曾誓以身殉其舅漢
朝白於邑令令以立孤終養勉之至丙戌秋漢朝
亦死曾葬畢遂絕粒十四日正襟危坐索筆賦詩
云云擲筆而逝

汪氏

浙江錢塘縣人家效文之女也夫歿作此詩絕

粒而死

絕命詞

于歸唐氏甫三秋萬苦千愁靡日休堂上甫離塵市境
所天相繼白雲遊從來未獲占熊夢叩地相依矢栢舟
迴想眉郎終莫報首陽風景好相酬

龔淑貞

江蘇太倉州人諸生挺之女也適同郡呂雲奇

乙酉雲奇死國難淑貞斷指自誓以苦節著

鎮洋縣志 國初太倉烈婦龔淑貞明諸生挺之女也十歲咏雪有梅花繡歲寒之句挺之奇之十六適呂生雲奇氏初名淑英雲奇易今名乙酉七月太倉歸順氏翁死之雲奇殉父氏以

有身不敢死及殞大雨室隘勿能將事氏猝起
引刀斷左手小指指墮地躍躍動血淋漓几席
問眾駭愕氏徐拾指焚諸香爐拜且哭曰所不
終為呂氏嫠者有如此指眾皆哭雨亦驟止天
忽開朗乃克禮殮于是賣屋築壙葬雲奇及翁
而結茅窮鄉力耕操作亂頭破服食不給則豆
渣雜糠咽之兄弟病其不堪以餓死事小對不
妄有乞貸也丁亥春江南訛言將選幼女寡婦
入都氏自紉其衣投園中池池水騰沸園姬驚
視挾之起得不死方雲奇死時氏年二十三所
娠以過悲而殞因嗣姪龍星丙戌夏龍星痘殤
乃嗣元星氏吟咏甚富惜未梓行孝廉陳瑚作
孝子節婦生
死合壙誌

自悼

殘菊含霜點翠苔子然零落帶愁開冰心懶向蒼天問
知是陽和不復回

自古名園費賞吟春風搖蕩百花林可憐惟有霜天月
照徹寒梅夜夜心

董文

字學舒四川閬中縣人適焦士宏年二十七稱

未亡人矢志守節撫孤養姑事載閬中縣志

書感

機杼聲中絡緯鳴未亡人已久忘情玉樓赴召今何在

不問三生問再生

陳克毅

字盈素浙江海寧州人知府蘭侯先生之女也

適當湖曹山補以苦行著著有餘生集

當湖閨秀陸蕙餘生集序畧餘生集者陳盈素
哭母哭女而作也余與盈素同歸曹門而盈素
為余姪山補婦故其生平所歷之艱苦余知之
特詳盈素系出海昌為實齋宗伯孫女蘭侯太
守之次女母夫人汪氏久以博學聞姆師之訓
涉及書史有自來矣年二十一歸山補甫四載
山補棄世遺腹一子亦未期而殤所撫者惟鬢
齡一女耳時或歸寧海昌一博母夫人歡老親
弱女聚首一堂月夕花晨間事吟咏計其一生
之樂境無過于斯嘻已足悲矣歲戊午一女猝
以病死未幾母夫人相繼歿仰無依俯無育熒
熒隻影有莫可控訴者因一托之于詩以自
寫其伶仃孤苦之况深宵燈火舉筆悽然泣罷
而吟吟罷而泣真字字皆血淚痕也今年夏盈
素出其詩一卷題曰餘生集屬余序之余讀其
詩黯然夫余不能詩竊聞詩之道不貴綺靡以
能抒性情為尚今餘生集緣哭母哭女而作蓋
發之至情至性直以吟哦當哀者豈徒誇尚綺

靡爭勝于閨門之秀哉聞是集者當勿第以聲律繩之

卽景思女

幽窻人跡絕深院日移遲風細穿書幌花飛侵硯池偶成惟苦句無事卽思兒自昔天難問愁懷暗自知

有悟

嗟吾與世復何求冷淡風光閱幾秋好勝有心偏少勝埋愁無地轉多愁道成原解生還寄智達方知死卽休斷却塵根通慧業已拚心跡付浮漚

閒遣

庭院蕭閑意自舒更無煩惱動嗟歔春歸秋去知榮落葉謝花開悟破除偶貸朱顏還賴酒飄殘華髮懶添梳雙鬢窻下勤機杼燈火深宵伴索居

自恨

舉筆吟多苦淒涼思轉迷可憐蓬牖下只有暮鴉啼

感懷

閑居萬事心多懶觸景無端淚易傾把卷小窻還覓句簾前乳燕冷窺人

劉氏

湖南臨湘縣人適沈某早寡

句

惜此分陰短無奈晨光釐

湖南通志劉氏湖南臨湘縣人其先政事文章利濟當世劉氏生而性烈每誦閱經史必講明義理歸沈某二十而寡守貞十七年歿有詩二句人以爲識其子建領鄉薦所歷仕途卓有政聲官至大丞中

徐德音

字淑則浙江錢塘縣人徐清獻公女孫旭齡之女適江都縣進士許迎年著有綠淨軒集續集

紀瑞詩

徐旭齡綠淨軒詩鈔序畧憶昔先清獻公制府淮南時吾女德音生甫數歲每長者故人至輒效男子長揖衣袴亦稱之一切瑣耳釵鈿之飾勿御也及遇賓僚賦詩先公呼之侍側卽能作

五七言韻語而意殊便給先公絕愛憐之謂若生男如是當不誤改金根惜乎其爲女子也未幾先公捐館遂持喪還武林女年稍長能畧涉羣書所居在湖山之閒每當烟雲入戶魚鳥親人輒復留連景光率吟小詩以自適一衣著最久視之墨瀋斑駁色若古彝保媪以他衣進亦弗易也其無他好如此江都許太史來菴故爲先公所得士有孫曰迎年儁才也當先公疾革鄭重語予曰昇時擇婿舍許生無可屬意者當折輦妻之余卒從其言女之歸于許也生猶列博士弟子員至是益好學遂得兩闈俱雋能以經術世其家親黨咸謂新婦有以相之也豈果然耶先是吾鄉林亞清夫人倡爲蕉園吟社知吾女能詩曾以縑素相遺通殷勤焉會吾女于歸邗上亞清亦隨官洛陽竟不果相見閱十餘年至乙酉之歲許生擢試舍人挈女北去時亞清先在京師始得把臂定交輒相見恨晚間以詩卷相質亞清喜而敘之且曰蕉園之社作者數人人皆有集今旣晨星寥落幾令韻事銷歇得子之詩政復後來居上矣其可不梓之以傳

乎女辭不獲遂昇荆氏而或者以為婦人職主
 中饋禮無出閫之言審如是則凡迹涉藝文者
 皆非也然竊觀往乘所載若班若劉之屬頌椒
 銘菊之家何更代有其人人有撰著似亦未盡
 非也第恐今之視古遠不相逮設為之不工是
 可已焉耳昔中郎賜書五千卷傳之仍屬愛女
 今者丹黃甲乙手澤俱存女盍追思先訓益勵
 將來苟得詩人溫柔之教必且能為禮樂之言
 是亦先公疇昔之意也遂書以示之
 歸愚沈宗伯綠淨軒續集序畧許年伯母徐太
 夫人為清獻公季女少歲研討典籍誦揚清芬
 已克傳家學矣及歸許門許為維揚鉅族代有
 偉人而年伯荔生先生以名進士官中翰於行
 已致身大節太夫人有以佐之暇則發為詩歌
 更迭倡和不啻雞鳴夫婦之相贈答者洎稱未
 亡持家政教二子艱鉅之投一身任之而詩之
 境界悉變為風雨漂搖之音矣既而長君雙渠
 學優出政將母官齋忽焉殂謝次君聖泉遠宦
 河防內患頻陵外侮沓至而詩之境界又變為

若華萇楚之音矣然而所值彌艱詩格彌上豈
 真歡愉之辭難工愁苦之言易好哉由其所以
 發言為詩者有立乎未始有言之先者也從來
 作詩之病恒多取材於詩故其意其辭每局於
 古人之詩之內太夫人學宗乎經識準諸史熟
 精文選旁又瀏覽乎諸家之集而一以靈敏之
 思運乎性情之真以合乎倫紀之大無論處常
 處變為欣為戚而總不失乎風人之旨也此豈
 潢潦無源之學所得而竊攀者耶

王明君辭

才士執高節美人矜令姿富貴豈不欲窮達安其時漢
 皇重顏色詔選良家兒王穰有好女秀色可療飢麗容
 難自棄一旦進彤墀長門與金屋權乃在畫師先容所
 不屑賄賂非無貲丹青既失意粉黛將安施曲逆久殂

謝誰復出六奇龍城老飛將長信索蛾眉孤憤幽永巷
寧隨秋草萎顧影徒自惜慷慨吐芳詞乃陳掖庭令逝
將靖邊陲從容別丹陛左右皆驚疑朱霞映白雪眇眇
生光輝朝廷恥失信抱恨出漢畿殷勤托父弟猶幸少
憐之驅馬向絕漠加號爲閼氏黃雲迷白草毳幙驚沙
飛胡笳鳴四野中夜肝腸摧琵琶時獨語泠泠一何悲
哀鴻唳青冢朔雪冷瓊枝遂令千載下長懷漢明妃和
戎非得已廟算良在茲借令老宮掖後世何由知鉏蘭
與泣玉古今傳者誰疇昔六王畢燕趙多彼姝阿房作
焦土艷骨成香泥折腰翹袖舞恩寵未嘗移四皓兆人
彘傾城乃禍機豈若慷慨節使我興遐思

白紵歌

羲和六轡迴蒼龍長紅小白粉作叢織肢綽約隨流風
翩翩冶態如驚鴻一寸眉峯暈春碧酒潮欲上蓮顚赤
熱心擬化百枝鐙長倚君王照瑤席

湖上行

芳隄載酒恣遨遊湖上湧作青螺浮桃蹊李蹊花零落
奇艷惟留紅芍藥暖風遲日倍宜人夾衣初試織羅薄
松風吹袂聲泠然白舫閒消半篆烟紫筍釵頭分建茗
青菱蟹眼淪山泉酒酣日晏清吟歇懷古無端意飄忽

憑高更指鳳凰山蔓草遙連宋宮闕

題投筆圖

豈薄雕蟲技翻思汗馬功生當封定遠夢合笑文通昭
代烽烟靜儒生意氣雄百年同一擲感慨畫圖中

古檀詩話繆毅齋孟烈囑畫師繪一小像帶劍乘馬鄭板橋變題其籤曰投筆圖文士題咏甚夥邦江許夫人五律云云意既周匝筆復渾融夫人系出錢塘著有綠淨軒集行世

中州瑞雪詠一百韻 有序

癸丑十月二十九日恭遇萬壽聖節是日中州大雪積可盈尺占為上瑞竊見制府平越公撰有百韻詩淵誦再三蓬心頓啟摘辭顯靈遠媿典謨振響和平直追雅頌是可播為太常正樂洵稱盛世元音者矣不揆固陋謬繼斯篇土鼓之音豈敢與鐘鏞並奏寒機之製奚堪借

黼黻俱陳方將焚硯未遑詎可操觚妄作然生居舜壤首戴堯天伏念吾許徐兩家累世或位崇旄節或踐歷清華並受國恩素叨深厚爰洎弱息佩璜猥以小臣仰蒙特受又受河東兩憲府及諸憲使公協衷賞批曲賜裁成夫詩稱言志歌以永言列國采風半多嬪女史書彤管不沒閨房則是詩也上以紀天朝之殊瑞中以揚前使之嘉猷下以摠感頌之末悃言雖不文而志則有取焉矣緘存家塾竊比擊壤之謠貽我子孫永觀泰階之盛

中州千里雪 聖節萬年卮 帝德遐昌日 皇心不

冒時百蠻修職貢五老覲彤墀璧彩留 宸矚瑤華擬

睿詞寒光凝象魏虛白朗眾罔仙籞璫為樹靈臺玉

作螭屢豐歡億兆上瑞慶維祺南極星重潤東郊秀兩

岐六田感霽霖四海被 恩慈玉屑飛鼇禁瓊英集鳳

池輕揚偕率舞飄灑詠來思 元德隨時上葭灰應律
吹續紛濡豹尾繁鶩拂龍旗銀燭光同燦銖衣羽共披
土膏滋八表甘露下三危肅肅周官禮雍雍漢殿儀康
衢徵有慶 靈鑒孔無私但上丹邱頌疇歌黃竹詩晶
瑩堆苑囿皎潔映宮帷神女搖珠珮靈妃縑素絲脫簪
思 聖后辭輦美賢姬揖揖仁風在振振福履綏葛覃
傳刈獲苕菜愛參差迴轉如紈袖光華映玉姿關雎誦
雅化樛木頌坤維繞電曾符夢高禩已敬祠 典謨邁
虞夏 神武並軒羲 睿智高千古 天威振九夸生
申作藩屏夢弼佐端揆銅鼓鳴威鳳商山茂紫芝三槐

原相裔姒姓本周支 優詔宣綸綍中區授節麾湘波
芳沆芷雲澤徧江蘼俗化文翁教恩留杜預碑 王言
深倚毗臣職竭驅馳期月民歸厚經年績允釐吹臺添
雅韻洛水更清泚啟沃侔周召勳猷勒鼎彝昌言逢禹
拜文思值堯期遐睇羣山皓欣邀萬彙滋來牟貽率育
林總半龐眉白粲均分給青鳧費不貲祗期無量壽仰
報億千施香縷雲堂合蓮幢覺路垂曇花現寶座善眼
刮金鏡我見猶人見無爲卽有爲八埏光舍利一芥納
須彌刹宇耶維窟菩提琪樹枝雪山生忍草德水沛平
陂西望霓旌繞東來紫氣隨芝田融玉液瓊屑醞仙醪

絳節高千尺瑤臺築九達鶴翎齋翠笈象簡拜青辭顧
保昇平歷長綿至道基大椿同歲月比戶樂雍熙 帝

日咨良佐公心丹若葵動勤勤稷契寅亮比臯夔棧樸
開文學冰霜洗陋規 聖朝多聘辟巖穴采英奇奉

詔常疑後求賢或恐遺懷文蒙鼓鑄抱質望爐錘自忝

廉官息堪嗟薄祚隳家君撫青社 宸翰賜清漪先君任山

東巡撫恭遇 聖祖巡方朝見行在 御 書賜清漪二字每遷漕運總督卒謚清獻失怙方髻齷

于歸慕縞綦綠窻晨試墨班管夜燃脂鴻案同賡韻芸

編共析疑右垣曾珥筆左掖亦吟梨忽抱漳濱疾俄驚

舟壑移舅姑兼養送堂構獨維持辱質嘗茶蓼噍音歷

嶮巖中郎惟弱女宣孟有孤兒戶牖綢繆定蘋蘩家室

宜影搖憐獨活心斷摘菴苑暎雪能勤爾丸熊復憫斯

棘闈頻被擯版築竟忘疲奉檄朝歌郡頒條淇水湄小

才慚寡識末學得真師旅進隨羣彥卑趨廁百司雕蟲

蒙藻鑿曲木遇班倅海若徒欽仰風塵久受羈倚閒思

古道晏歲悵天涯郊甸青陽動雲霄綠字貽雅音含律

呂頌體挾龍鬣元氣迴磅礴卿雲眩陸離曹劉應退避

燕許敢攀追嵩嶽呈蒼翠黃河勢渺瀰世儒皆矻矻庶

女也孳孳溟渤持蠡測昭容學管窺茁芽看碧蕙出谷

聽黃鸝妄擬莛鐘叩希邀匠石知多慚垂耳驥畧試處

囊錐續史師前哲飛龍驗吉著
 重華咨岳牧黎獻出
 藩籬刷羽搏空便修鱗縱壑遲上游先示的鏞鐵快逢
 磁建學傳經術安人教淑熹天高瞻
 北闕風動自南
 箕積潤流膏澤迎陽解凍漸萬方齊蹈舞億禩享平治
 一德明良會無疆錫瑞禧

試劍石

石上痕如切純鈞性最剛陽山飢渴日何不試夷光

出塞

六奇枉說漢謀臣後此和戎是婦人若使邊庭無牧馬
 蛾眉也合畫麒麟

句

旅思搖風鐸歸心縱壑魚
 竹籜含新粉藤花落細香
 潮來初拍岸雲起忽遮樓

蓮坡詩話開封司馬許渭符佩璜學有淵源少稟
 母訓所著詩文具見根柢贈余云鹿人孫北海置
 驛鄭南陽又胸能貯邱壑性本嗜林泉後奉太夫
 人來游水西莊太夫人有句云云太夫人錢塘徐
 清獻公旭齡女名德音熟精文選流
 覽滿家至今老年猶日閱書一寸

袁潔

江蘇嘉定縣人年二十而寡黃靜御稱其詩幽
 峭清麗誠非謬賞

清明

簾捲微寒獨坐時東風滋味病中知
梨雲未冷三春夢
杏雨爭催二月詩
愁怯花魂輕欲墮
恨消蝶骨瘦難支
不知今日江城柳
留得青青第幾枝

秋閨

懶向妝臺咏白頭
幾曾教去覓封侯
多情惟有秋天月
會伴離人長夜愁

張湘文

夫亡矢志惜其字里不著

輓曾如蘭

一鞭先我義從容
節孝聲名奏九重
絕粒已今歸去也
玉樓人在好相逢

羨君志烈我當隨
奈有翁姑膝下兒
令德於今傳國史
投崖斷臂又何奇

李氏

江蘇崑山縣人
適同邑周道行
于歸甫五月而
寡

梅花

香魂世外裝誰識
冰心苦任他風雪欺
含酸能結果

崑山新陽合志周道行妻李氏道行爲百總結禱
五月遠赴漳州而卒時氏年二十三有勸氏更醮

者氏曰人各有志惟求無愧于地下無相強也因題梅花詩云云以見志守節而終

孔麗貞

字蘊光山東曲阜縣人世襲博士毓埏女適濟

南太僕少卿戴璠子文湛著有藉蘭閣草

曲阜縣志歷城戴文湛妻孔氏毓埏女傳鉅妹名麗貞適戴一載夫亡守節四十餘年麗貞能詩與興焯妻顏氏相倡和著藉蘭閣詩草發乎情止乎義君子稱之

蘊光氏藉蘭閣草自序略境有順逆固不能強諸天情有悲樂亦不能必諸己余幼居深閨中蒙二親顧復朝夕不離左右每花晨月夕吾父與伯兄共四方執友流連詩酒竟日方休我母春則烹新茗夏則設盆冰秋則焚蘭香冬則煮家釀以待我父歸來興若未闌或評詩或玩月或理琴敲棋彼時余同長兄怡怡侍側天倫之樂至此為極故有雙親兩意同之句以誌其喜

未幾長兄謝世余賦于歸結禱一載夫君與幼弟相繼淪亡于一月之中我父我母復棄余長逝于八年之內人世之苦亦莫此為極形諸墨瀋者亦遂易喜為悲矣情隨事遷意緣境移不信然乎哉至若往來于歷水灤山徘徊于繡戶紅窗偶有吟咏無不可于悲樂間分之此小集之大概也癸卯春紅萼軒長兄憐余苦衷解囊付梓告成之日余始得知紅萼兄敘于前怡齋兄跋于後既感且愧竊恐世人見之譏予為不揣固陋爾

哭亡夫二首

親老妾心悲哭君無盡期月圓分鏡日雨滴斷腸時生

死魂難聚幽明路已岐縱為華表鶴留語復誰知

孝友繼家聲溫恭自性成如愚何默默守拙獨硜硜澹

泊恒為樂炎涼素所輕冷言聊作誄那得盡平生

中秋對月

玉宇無塵萬籟幽捲簾一派暮烟浮
飛燕方辭社寂寂寒蛩已報秋
桂蕊迎風香滿袖桐陰繞座月當樓
世情爭似清虛好不染人間半點愁

讀玉峯書城葉夫人詩因步其韻

卜宅臨江志自伸柴門常閉不知春
汲泉淪茗全拋俗繞舍栽蔬未是貧
曲徑花鋪鶴夢穩茅齋雨過燕泥新
只憐落落無儔侶同調難逢我輩人

趙氏

號秋浦浙江錢塘縣人知府本植之女兄也適

鴛湖胡氏子某早寡著有紅餘小草

詠並頭盆蓮

萃華妙爽總天機相映朝霞與夕暉
水淺未容鴛並宿香遙時引蝶雙飛
紅綃碎剪瓊爲珮翠蓋交加錦作圍
默向花神乞靈種年年開放莫將歸

酬采芝山人賜和詠蓮

報章重疊咏芙蓉麗句妍辭愧不如
攜向南牕日三復謝家風調右軍書

寫生賦物稱雙絕今見西崑妙絕倫
料得丰神似秋水故教摩詰認前身

陳齊宋

福建福清縣人葉惟烺之室也

句

二載錦囊成百歲一縵冰骨係三綱

福建續志陳齊宋葉惟烺妻也歸葉惟烺僅一年夫卒服喪三年一日作詩云云遂自縊

孫淑

字靜谷江蘇常熟縣人諸生許灝之室著有詩

集四卷

國朝詩別裁集孫淑集中有達哉行作於九十歲時述孫許兩家門戶之盛衰一已終身之閱歷皆樂天安命語也共五百餘言一時遠近傳誦

五日弔古

田文五日生屈原五日亡吉凶同此日理固難推詳原與國休戚一死分所當漁父櫂自鼓詹尹龜宜藏抱石投湘流心與日月光文從狡兔計高枕樂未央後合魏秦趙伐齊何披猖身死薛隨滅高戶仍不祥文生雞狗雄原死荃蘅芳世人何夢夢悲屈美孟嘗我心獨不然臨風慨以慷撫時懷往事聊進菖蒲觴

張佩華

浙江仁和縣人詩見雙節堂贈言集

汪氏雙節詩

同貞勁節絕人寰彤史分題倩馬班霜月兩娟寒鬪影
瀟湘萬竹淚勻斑機頭斷處文章出 天耳通來 綸

綉頰獨惜泥金傳帖子後先鶴馭杳難攀

嗟余身世等枯桑廿載零丁痛未亡辛苦已甘蟲食蓼

襦襤敢笑鼠銜薑發帷子影誰同調石闕雙輝奉瓣香

滿卷淋漓臚壺德一回展讀一迴腸

曹氏

自稱虛全子浙江秀水縣人許字姚生鼎黃夫
亡矢志守貞著有睡餘集十卷

萬光謙睡餘集序戊子秋姚君駿和手一編示予曰睡餘集屬予為之序集為虛全子所著虛

全子曹氏秀水人生長閩幃性聰敏樂觀古人
書許字駿和之兄鼎黃鼎黃勤學早折虛全子
植志守貞端行孝友習女紅外時作詩以自遣
篇中於父母昆弟存歿間三致意焉予維古來
詩之流傳視乎其人之行可以不朽則詩亦與
之俱傳虛全子食貧居寂潔已敦倫其詩篇所
在將與堅貞之操並垂久遠寧

第假景懷情吟咏一時已哉
曹大文睡餘集跋云睡餘集十卷吾妹虛全子
所著述吾妹幼即穎悟好流覽羣書許字同里
茂才姚鼎黃姚君早折守貞自矢事兩大人存
歿盡孝故其發為詩歌實根至性非徒以吟椒
賦菊自矜才華也今年五十六矣會將集
其苦節以告當事時乙酉歲春王月也

感賦宿鳥擇深枝

鬱彼林樹深掩曖相周遭知饑來眾鳥爭飛鳴嘈嘈一
枝欣所托四顧自遊敖胡為紇千山有鵲常苦勞饑不

美飲啄寒不美衣毛特棲邈儔侶僻處絕猿猱風雪起
暮時中夜恒悲號悲號亦何求托枯乃其操

螢

因時化腐草向晚弄微明燼綴青莎好光翻紈扇輕遠
飄金殿靜轉送玉階行寂寞書齋裏還勞作夜擎

紙鳶

巧製霜藤出化工好乘春煖度晴空幾番搖曳因風勢
一片光輝借日紅輕薄未隨雲影散浮華恐逐雨聲終
浪傳霄漢身高致猶在童兒掌握中

白秋海棠

不隨繁艷競春光冷淡秋風別有香已悟緣空真色相
非關命薄洗紅妝露華點綴瑤階靜月色虛明玉砌涼
爲憶古人詩句好碧苔永夜醉相將

湯婆子

自煮清泉絕點塵一團長許老人親煖分天上陽和氣
溫奪人間錦繡春獨枕有緣稱老婦專房無意妬夫人
梅花帳底尋消息偏愛溫柔別有因

南樓雪望

寒鎖頑雲白日昏瑤華頃刻徧乾坤郊原已失當時景
林樹全非舊日村何處還來乘興棹幾家肯掩養高門

蕭騷獨倚南窗下贏得詩懷祇自論

劉文貞

字里未悉

句

桃花暮雨烟中閣燕子春風月下樓

逸樓論詩節婦劉文貞有詩集行於世云云其最著也此與唐人鷄聲茅店月人跡板橋霜皆不入一虛字成句若胡兆麟十里鶯花桃葉渡半帆烟雨木蘭舟抑其次矣文貞蓋邑士大夫私諡云

張藻

字于湘江蘇長洲縣人印江令張笠亭之女畢

尚書沅母也著有培遠堂集

王昶培遠堂詩序培遠堂詩四卷畢太夫人所作也秋帆中丞之母出張氏母顧恭人有挹翠閣集昶壯與少儀觀察游觀察於太夫人為女知其上承母教因以能詩若此今誦其詩為女貞為婦順為母教而和皆可於此見之當及之開府西安也貽詩作誠尤切於民生國是及迎養官舍則以勤儉仁厚之意風示然雅不欲以詩自著此其沒中丞始集而錄之而屬昶序其端太夫人之且鎮撫至十餘年民之獲治適在周南豐鎬之地且鎮撫至十餘年民之獲治適在周益馴而禮化日益洽皆推勤儉仁厚之旨以行之太夫人之詩不為虛言中丞又能推行其訓以佐國家葛覃麟趾之盛豈不休哉

袁枚培遠堂集題詞當代欽陶母中朝說敬姜

綠野堂閒情賦翰墨妙詠富琳琅我昔燕臺住

恒多角逐場未會逢畢萬先已識張蒼謂少儀

可解王郎聽講依紗幔太夫人從母受詩拈題

傍鴈行風騷心竊慕佳話記能詳從此名臣業
 都由母教彰九熊資仲郢畫荻啟歐陽身躡金
 鰲頂枝攀月桂香正壽康才原兼福命天更與
 陝右分符節庭闈正壽康才原兼福命天更與
 聰強處貴猶操約施仁乃發詳揮毫書訓試馳
 傳寄吟章教把官箴厲毋將國事荒盡仰望慈
 報稱任重亟周防僚吏齊抄誦軍民盡
 雲來覆照赤子起痍傷就養秦闕道欣看萱草
 芳兒童爭識認旌旆更飄揚韋曲花扶輦西園
 夜舉觴鵲鳴仍唱和少儀觀察常至節署太夫
 人喜照作詩桃李聚門墻幕府多諸名士筆取
 珊瑚架思抽錦繡腸牀前堆玉軸膝下列銀黃
 此日榮華極當年苦節償俄驚歸闥嶠未見督
 荆襄屏掩金泥色星沉寶婺光淚雖彈孝水阡
 已立瀧岡往歲尚書駕蒙過野叟莊忘形留柴
 戟小住獻壺漿客貴隣驚問談深漏覺長雲泥
 今遠隔瓊玖每貽將賜我遺編讀傾心闡德臧
 詞源追四始詩格駕三唐共仰徽音播真如廣
 樂張應留人世
 海歌詠一千霜

送子沅巡撫陝西

讀書裕經綸學古法政治功業與文章斯道非有二汝

宦久秦中洊膺封圻寄仰沐 聖主慈寵命九重責日

夕為汝祈冰淵慎惕厲譬諸構榱材斷小則恐做又如

任載車失誠則懼躓捫心五夜慙報答奚所自我聞經

緯才持重戒輕易教勅無煩苛廉察無猥細勿膠柱糾

纏勿模稜附麗端已勵清操儉德風下位大法則小廉

積誠以去偽西土民氣淳質樸鮮糜費豐鎬有遺音人

文鬱炳蔚况逢邳治隆陶鈞綜萬類民力久普存愛養

在大吏潤澤因時宜搏節善調理古人樹聲名根柢性

情地一一踐履真實心見實事千秋照汗青今古合符
 契不負平生學不存温飽志上酬高厚恩下為家門庇
 我家祖德詒箕裘岡或墜痛汝早失怙遺教幸勿棄嘆
 我就衰年垂老筋力瘁曳杖看飛雲目斷秦山翠

抵署三首

驂駢乍解路三千風物琴川慰眼前到處聽來人語好

頻年豐樂使君賢

運朝話舊到更深不盡婁江望遠心莫怪老人添白髮

兒童幾輩換鄉音

周遭竹嶼與花潭檻外雲光映翠嵐儘有瑣窓詩料在

不須回首憶江南

隨園詩話古陶太尉歐陽少師之母俱以教子貴
 顯名傳千古然兩母之著述不傳即宣文夫人講
 解經義幾與孔子並稱而吟咏亦無聞焉近惟畢
 太夫人兼而有之夫人名藻字于湘印江合笠亭
 先生之女余同徵友少儀觀察之妹也偶咏梅云
 出身首荷東皇賜點額親添帝女裝首句本出無
 心未幾秋帆尚書果殿試第一繼王沂公而起吉
 人之詞便成詩識事亦奇矣太夫人雖在閨閣然
 即以平日素嫻經義自能通達政體出之裕如當
 夫秋帆尚書出撫陝西時太夫人作詩箴之云云
 讀其詩可謂訓詞深厚不減顏家庭誥未幾太夫
 人就養官署一路關心訪察政聲聞長安交老俱
 稱尚書之賢太夫人喜抵署又賦詩云云太夫人
 受封極品考終官署庚子上巡江浙尚書居憂
 里門謁于行在具陳母氏賢行上賜經訓克家
 四家尚書建樓于靈巖別業以奉宸章當世榮
 之有培遠堂
 詩集行於世

又培遠堂集中美不勝收摘其尤者五古如靈巖
 山館夜坐云圓景下絕壁山館忽已暝石磴靜張
 琴雪泉清淪茗不知夜已深月上青松頂五律如
 正月月十二夜云銀缸暗畫堂坐數漏偏長雁影半
 隋月雞聲萬瓦霜夜吟多遣興春夢不離鄉庭下
 微風起梅花入幕香落葉云微霜零木葉秋氣乍
 蕭森亂逐西風下多隨涼雨深紙窗延皎月苔磴
 失層陰偶爾凭闌立平林露遠岑七律如小園云
 小園半畝寄西城每到春深信有情花裏簾櫳晴
 放燕柳邊樓閣曉聞鶯漢書舊讀文猶熟晉帖初
 臨手尚生自笑爭心仍未忘閒招隣女對棋枰七
 絕如探梅云光福寺前日欲曛上陽邨外望細縵
 千林萬壑浩無際不辨湖光與白雲春殘云裴几
 熏鑪百衲琴綠陰門巷晝沉沉春來小苑無人掃
 花落窻前一寸深松徑云曲徑彎環石級高滿亭
 山色綠周遭松風似厭泉聲小自寫雲門百尺濤
 五排如雁字云一片雲藍紙鴻文絕點瑕禽經殊
 古雅羽檄等紛拏每作檉聯起何曾叙次差銜蘆
 如運筆游霧類塗鴉凡鳥徒貽誚家鷄詎用誇緘
 情來塞北傳信向天涯四出驚風急低橫遠岫遮

諧聲呼伴侶破體遇弓韞行斷疑從缺書空點不
 加奇姿多縹緲取勢故欹斜欵翰停搗藻臨池戲
 劃沙鷺羣猶遜巧鳳策足聯華水映騰清稿烟籠
 護碧紗揆天才不媿逸興寄雲霞五言絕如雨夜
 云向晚花冥冥獨坐理琴譜一縷茶烟生疎簾散
 春雨六言絕如夏日作云撥火鑪香颺來卷簾梁
 燕飛去吳門六月猶寒雨在江南何處皆有清微
 淡遠之音真合作也其他名句五言如望華云日
 生常夜半雲到祇山腰嘗新茶云未乾春露氣猶
 帶曉雲香虎邱云隔花皆有閣入寺始知山江村
 寓目云山吞將落日風抵欲來潮七言如梅花云
 獨與白雲如有約遙疑積雪亦生香聞蟲云花徑
 雨過苔乍冷豆棚風定月初明野望云雨餘霜葉
 紅于染風定炊烟白欲凝靈巖懷古云香徑花開
 人去後屨廊風響月明中登澄觀樓云
 積雪明多能淡日遠山寒極不生烟

擷芳集卷之五目錄

節婦詩

古歙訥菴汪啟淑選

嚴乘 三首

王靜淑 五首

顏氏 八首

張令儀 十四首

劉氏 十一首

黃幼藻 六首

黃幼縈 一首

姚氏 二首

張學象 八首

吳氏 一首

慕德琰 四首

徐氏 三首

方筠儀 一首

擷芳集卷之五

古歙訥菴汪啟淑選

嚴乘

字御時江蘇長洲縣人適鄭董如通周易葩經

精術數工詩文早寡

七十二峯足徵集氏諱乘字御時秀有志操通周易毛詩適鄭董如年二十有五而寡無子以猶子茂敬嗣慈愛無間茂敬復早喪遺孤棟方數齡教肅推命理謂當以麟經發解至康熙戊必不死詳推命理謂當以麟經發解至康熙戊子鄉試棟果以第三名魁春秋房人咸神之性孤介端重撫孤兩世苦節終身乾隆六年建坊旌表

懷親

卓犖英標迥軼羣湖山清爽絕纖塵嚴霜飽鍊蒼松晚
膏雨勻占芳草春金玉韜光懷世寶鼎彝留範作家珍
山頽木壞今安仰斷簡殘編最愴神

憶兒

閱盡繁華不解顏清風明月足承歡
焚香講易天心復剪燭談詩午夜寒
且喜晨昏甘菽水共憐身世屬艱難
祇今雲樹霜林句撥觸酸辛不忍看

兒嘗寄詩有霜林自染懷親淚雲樹

徒傷遊子心句

課孫夜讀

吾宗兩世盡衰微賴汝庭闈命共依
日對聖賢猶未是

暫親花鳥便全非孤燈影伴三更月
勤讀聲隨五夜機他日學成安出處
錦衣不與換斑衣

王靜淑

字玉隱號隱禪子浙江山陰縣人宗伯王季重
先生之長女也適陳樹勳早寡與妹玉英齊名
著有清涼集青籐書屋集

初夏偕玉映妹遊山

欲覓清幽處山高恐不深
閒雲飛別岫野鳥定花陰
筍嫩留饑採茶香待渴吟
深閨無限意觸景破愁心

秋日菴居

空齋度深夜高卧一牀秋苔老渾無色溪清淺欲流塵
隨紅葉埽心付嬾雲收蕭瑟聞征雁空歸萬籟休

贈鄰姬

梅影疎窻瘦衾裯薄又寒侍兒不解意指月上闌干

九日遲玉英妹不至

細雨淒風阻鴈行竹籬茅舍薄羅裳登樓嬾看黃花瘦

山老林紅一夜霜

柳

乳燕黃鶯三月時春風拂地柳垂垂長條不繫行人住
猶向江南送別離

顏氏

號恤緯老人山東曲阜縣人考功司郎中光敏
之女也適同邑孔興焯早寡守節奉 旨旌表

著有恤緯齋詩

山東通志孔興焯妻夫亡誓以身殉數日不食
其姑勉以代終大義乃遵姑命守貞事姑甚謹
問寢視饌夙興夜寐者數十年如一日所
生子殤以姪毓焯嗣教之成立人稱其賢
曲阜縣志孔興焯妻顏氏光敏女夫死絕粒五
日誓不欲生所親以大義諭之乃強食孝事堂
上數十年如一日既侍夫及舅姑疾久博涉古
書常製丸散以濟鄉里之熒獨者工文翰著有
恤緯齋詩

晚香堂詞

顏懋价曰先姑自幼端慧從父授書旁及琴奕
夫既早亡矢節甘貧踰六十載被 旌如例教

嗣子及孫皆為諸生集名
晚香堂詩後更名曰恤緯

哭母

我母辭人世淹忽八閱月卜時清和初歸窀禮罔闕雪
涕挽靈車腸斷輪不發寡女啼血盡麻衣慘白髮但恨
地下土不使肉生骨皎日入西海荒林人影沒

遣病

夢廻芍藥香相續暖風吹雨梅子熟階下石榴駐晚霞
繞池竹映湘簾綠家貧無力種茯苓病久應知疎骨肉
草堂泥新絕纖塵道書攜就窻中讀

西窻獨坐

獨坐秋宵裏西窻月正圓竹疎風細細花靜露涓涓得
句吟蟲候更衣暮杵天多應猫捕鼠觸動素琴絃

贈別藉蘭主人歸濟南

有序

孔麗貞字蘊光博士宏輿公之女太僕卿戴公
之兒婦也精詩畫翰墨結禱甫一載夫旋死未
幾其同產兄亦死博士公無子復逆蘊光歸居
里第其兄先聘李氏未成婚矢志不他適蘊光
與同事博士翁媪無間言時有兩家奇節萃於
一門之稱迨博士翁媪謝世喪葬如禮乞於大
宗為立嗣焉蘊光復以在魯無所依返之夫家
還於樂水上瀕行矣遣老婢來贈余畫篋一藉
蘭閣詩刻全冊用為留別且索余作詩余自夫
君亡後四十餘年茹荼集蓼與蘊光同其悽楚
而蘊光之天親骨肉凋零欲盡則視余為更烈
晚窻脫稿遂成悲風怨雨之音素紙寄將誰和
別鵠離鸞之調當世不乏名媛睇
觀此詩庶知余兩人之苦衷云爾

蓬轉信無定人間多別離日歸愁短髮分手易前期
閨閣神仙品綺羅冰雪姿長成惟嗜學生小自吟詩黃鵠
歌何速青鸞舞已遲既傷慈母背旋痛阿爺隨黽勉營
喪葬倉皇誓墓碑一門同作鬼兩世竟無兒婦烈箕裘
重女孀繼述奇剪刀收破碎書篋理殘遺反魯尋田宅
辭齊閱歲時蕭條君與我邂逅友兼師就正疑難字還
傾深淺卮曉葵和露折香糯共烟炊事往常中變途窮
每遇岐駕車辭里閉秣馬向天涯洗黛換行色賣琴充
路資昨朝詢婢媪來日賦驅馳留贈團團扇重題絕妙
詞庭篁存密節河柳挂長絲看劍孤懷迴牽衣獨淚垂
他鄉應健飯故國總相思未卜鷓鴣穩難逃斥鷃嗤遙
知圓月夜新有夢參差

夏夜

雨歇雲邊露玉弓匡牀移向樹當中荷方舒卷明新露
蟬趁虛涼語上風破鏡詩殘塵夢遠素琴絃折世緣空
坐來寂寂更初動竹裏螢光數點紅

觀物

蚓非求飲食蛙不辨公私落日芳塘上爭鳴何太癡

秋

門閉窮秋最寂寥西風吹雨晚瀟瀟無眠數盡樓頭鼓

一夜閒愁滿綠蕉

禽言

春雲漠漠日昏昏花裏禽言最斷魂聽到不如歸去好
東風吹淚濕衣痕

張令儀

字柔嘉安徽桐城縣人圃翁第三女研齋中堂
同懷女兄也適沈湘門鴻案倡酬人爭企羨著

有蠹窻集

茶餘客話曹能始得家信詩云驟驚函半損幸
露語平安當時推為佳句亦平平耳張令儀為
文端公女得家信寄母詩云心知本是平安字
猶自遲疑不敢開情真語真妙是閨閣語故不

妨耳

國朝詩別裁集張文端公長女也工古文不專

韻語端本殖學比於韋逞母之授經

張廷玉蠹臆集序三姊生而聰慧工織紵組紃

性嗜學少侍太夫人讀書京邸簡帙及案無不

披覽先公退食時嘗試以粵事應對了然所為

詩文輒哀前及笄歸吳與姊夫湘門先生閨門

公甚異之及笄歸吳與姊夫湘門先生閨門

相屬和湘門世家清宦室靡長物吾姊總持內

政湘門得與諸弟先後受室歸里門常與湘門
館時余與諸弟先後受室歸里門常與湘門
題角藝吾姊亦時出其所為詩歌古文辭每
酒闌燈地辨晰古今事不少休彈指十數年內
吾姊裨益于諸弟者良多及先公予告偕太夫
人南還棠花尺吾姊時親色笑問起居而先
公暇日與子孫徵引掌故背誦古人詩篇吾姊
援筆歌賦動輒數千言所以娛先公于衰年者
尤為曲至也嗟乎曾歲月之幾何兩大音容
已不及見予與三弟繫官於朝回念當時團聚

之歡邈不可得而湘門中年多病又永歸道山矣今幸兩甥成立家業不墜吾姊猶得以藉餘閒斟定其生平未竟之業跡其所

雖惠姬文君之屬何以加于此哉張廷璐蠹窻二集序叔姊既刻其二十年前之詩為蠹窻一集已行於世矣越數歲次甥為通

州判官迎養潞河往來京師每寓居於澄懷園中高館長廊方亭曲榭水香蓮開之旦露華松

籟之夕明月入懷好風披袖日之所遇耳之所受意興之所恬適無不寫之於詩越歲南歸長

甥復之官楚中叔姊獨留里門秉家政迺構城南別業築屋十數楹堂庶亭館之屬靡不畢備為小樓以觀山疏方池以納泉以至一花一木皆出其胸中之邱壑以經營而布置之卜築既成署日南園向之寄暢於澄懷園者一旦得之於手構之餘以寢興食息於其中春朝秋夕流連景光儔侶魚鳥又無不於詩寫之楚南燕北兩甥皆懇請就養叔姊堅不欲往其視榮膺紛華之境泊如也蓋叔姊天資明慧博覽載籍以高朗之襟懷契山林之勝槩如間雲老鶴超然

於塵埜之外故其晚年之詩格律益細風骨益堅無雕琢之迹而摛藻清華無靡曼之音而寄情深遠頃復彙其二十年以來之詩共若干首為蠹窻二集而授之梓予謂詩三百篇尚矣其

問婦人女子感時觀物皆能言其性情以登采風之選漢魏而降所稱班姬謝女與夫秦嘉之妻孝儀之妹見於簡冊者代有其人而其詩或

一二篇多者或十數篇已足名當時而傳後世而要未有如蠹窻之詩之多而愈工者予知其必傳於後無疑也輝映藝林鼓吹風雅且將與古作者埒又豈僅形

管香奩之盛事已哉令儀自作小傳蠹窻主人者生于華胄早事梁鴻頗厭紛華能甘淡薄當其鐘鳴鼎食之際歌

珠舞翠之場主人視之蔑如也唯愛焚香靜坐獨處一室左琴右書湘簾棊几古玉尊彝之屬貧不能致然雅愛圖史有未見之書雖鬻簪珥必購得之或見其室中牙籤插架縹帶盈牀遂目為蠹窻主人云閒為吟咏祇自道其離愁積抱秘不示人而性又酷嗜花木居室前地不盈

丈嘉木參差雜花掩映幾無置足處主人顧而樂之不以爲隘也與世無求寄情草木亦灌園氏之傳歟

蠹窻對月

徘徊愛良夜吾廬有佳趣星稀月轉明冷侵階前樹疎影自縱橫正對鈎簾處藻苻散庭除水光還四布曲檻好尋詩修廊宜緩步寒花浮酒盞落葉添茶具鶴巢松樹顛靜夜如人嗽高天鴻鴈鳴唳入秋雲去坐久欲忘眠煩襟感涼露欲寫此時情誰能展毫素

烏棲曲

金谷園中百尺桐慈烏將子巢其中霜華墮地月如水艷舞嬌歌畫燭紅石崇沉醉綠珠醒銀河半傾金翠冷後夜高樓月自瑩不見珊瑚美人影

秋夜長

嚴霜倒浸簾櫳冷半壁孤燈寒耿耿秋老啼殘絡緯聲月明瘦盡梧桐影啼烏有意隔紗窻窻裏愁人淚一雙兩兩飢兒啼下國迢迢頰尾滯寒江機中錦字休裁怨且織征衣還寄遠天涯若問此時愁一江春水猶嫌淺

採蓮曲

消夏灣頭露華曉風動芙渠香嫋嫋吳娃紅袖映花明中流爭羨鴛鴦好西施一笑迴雙眸芳香滿載木蘭舟

酒酣玉簾涼如水西風莫遣吳宮秋

鬪草

綠牕曉夢鶯啼醒粉薄螺輕粧不整瑤琴罷軫玉笙寒
花慵柳困春閨永東隣女伴偶過從相邀莫負芳菲景
共向南園鬪草嬉攀芳拾翠搜求盡稱奇覓巧自挑泥
玉尖寧怯蒼苔冷袖中別出謝公鬚神彩如生光炯炯
低回暗自卜心期小立花前垂素頸榆錢輸盡拔金釵
人醉東風依露井乳燕鳴鳩白日長笑聲遠隔鞦韆影

讀霍小玉傳

獸環鎖闔青苔院荳蔻稍頭春一線柳烟籠日翠輦輕
花霧著人紅玉艷芙蓉繡帶寶奩開風裊釵梁雙玉燕
芍藥裁成絕妙詞簪花小試琉璃硯侯門白璧自無瑕
誰教青鳥偷嬌面楊花飛入惹春愁門外王孫嘶紫騮
錯認牧之非薄倖同心縷帶縮風流畫眉窻下調螺子
翡翠蘭苕夙願酬地老天荒情不變烏絲素盟足千秋
銀箏錦瑟歡初洽別鶴離鸞溝水頭密誓俄成烏鰓墨
新歡又占鳳凰樓蕭娘骨瘦心如鐵宛轉纏綿難決絕
羸卧空閨若箇憐鸚鵡窻前頻嘆息訪求消耗擲金錢
寶釵零落無顏色長安三月牡丹時契友相邀數陳說
毗裂髯張忿不平多情感動黃衫客鞭馬羞過勝業坊

胡雛強控黃金勒支離病骨倩人扶曉衾鞋夢芳心接
含情凝睇薄情人聲聲訴出啼鵲血穉齒韶顏飲恨終
一慟重泉沉怨魄精靈苦妬後來歡數教所愛生離拆
曷不追取負心郎貞魂化作紫鴛鴦紅珠露冷蓮房老
雙宿雙飛向野塘

晚春坐春暉亭

結構無多地鄰園藉綠陰烟霞無俗態花鳥得同心雨
足閒鋤藥茶香靜理琴此中塵事少頗似住山深

北郭尋秋

野濶風吹袖茫茫平楚間秋隨人意冷雲共客心閒鳥
墮將殘夜烟生欲暮山怪他烏柏樹著意染衰顏

小院殘春

幾樹殘紅瘦不支綠陰滿地燕參差春歸細雨斜風裏
客病輕寒薄暖時鬪草簾櫳人寂寂鞦韆庭院日遲遲
柳花飄蕩東西陌閒殺青青百尺絲

焚香

空階冷雨夜廉纖寶鴨香消手自添細靄幾絲縈斷簡
閒雲一片護疎簾人同嗅味原離俗詩沁餘芳覺轉恬
茗椀吟箋聊自適幽窻韻事許誰兼

早秋夜坐

水簾涼生暑漸收雨痕洗出秋天秋微風小院花香合
淡月空階竹影浮繞砌亂蟲攪客話誰家孤笛喚人愁
蕭蕭夜色清如水坐看星河漸欲流

秋夜作

雲外驚心旅鴈草根和我寒蟲落葉打窗似雨啼烏繞
樹驚風

咏十姊妹花

東風萬物荷生成隊隊紅香照眼明衰病天涯憔悴客
自憐同氣各枯榮

蠹牕

沉水香中夜漏餘月痕冷浸一牀書百城未敢誇南面
且乞閒身作壁魚

劉氏

漢軍 旗人湖南臬司劉廷璣之女兩淮分
司張淵度繼室夫亡守志未幾亦卒著有繡餘

詩及遂閣哀吟

張汝滇南憶舊錄余同堂兄淵度行四繼配嫂
劉氏為劉臬司廷璣在園公之愛女性幽靜博
覽羣書常以班謝自命在園公憐之甚因擇婿
過嚴及笄尚待聘適淵度先兄有悼亡之感哀
吟百章頗為時流所傳誦在園公既久知其名
會目為天下才及見悼亡什益重之乃倩媒議
婚逾期年而嫂于歸主中饋有荆布風家門之
間無不欽其賢孝暇時舉案倡酬為閨閣中詩

文友後四兄分司兩淮委濬泰州鹽場河積勞
病暑卒於官嫂毀慟不欲生作遂閣哀吟數十
首甫三年亦歿當易簀日舉手謝諸弟姪曰未
亾人今可謂張氏完人矣言訖而瞑遺篋著作
復有繡餘
吟二卷

寄兄秉一

無限家園思啼痕時染衣雲迷烏斷哺風急鴈分飛堂
上慈顏隔庭前花萼稀音書頻寄問何日漣裳歸

承九書室落成書以勉之

靜几明窻下文思自不同江花添筆底謝玉長庭中愧
少三遷教須勤萬卷功春風他日裏上苑杏生紅

憶母

明珠朝夕掌中持一旦于歸定省離此後惟宜習勤儉
從今寧復敢嬌癡未諳婦道時懷畏欲慰親心強忍悲
廿日慢言音信少夢魂夜夜繞慈幃

望露筋祠二首

正氣存天地新祠古道傍草含貞色秀千載烈名芳
白鳥何其毒紅顏數合奇路過無祀物遙望奠霞卮

送含章表嫂隨任南城

玩花同上月明樓刻燭詩成遜一籌彤管從今難較勝
平分花月更分愁

閨幃人有筆如椽韻友交宜翰墨先更勸從茲當節儉

俸錢不穀買書錢

哭夫二十首

選四

斯人不壽誠天道之無知吾命不辰罹人生之慘酷忍睹伶孤子遽失併蒙可憐孱弱雙嬰甫離襁褓故撫棺欲絕一絲又續驚魂碎鏡長號三月仍留殘喘其奈深悲極痛鬱鬱於衷是以灑血濡毫哀哀而想眸枯心瘁意愴神悽才難擬彼黔婁柳下之妻慟更甚于華周杞梁之婦哭成廿首短章悼紀千秋長恨云爾

十餘年事憶如新不信真成薄命身艷彩嫁衣穿甫半

青絲已作未亡人

聚散由來有夙緣敢因慳淺怨蒼天過頭五十君非天

自恨遲生二十年

積累仍多身後逋清風誰信俸無餘宦囊亦有頻年蓄

錦軸牙籤數卷書

兢兢十載事蘋蘩分荷千鈞敢自安今日欠君惟一死

衰親弱子慟難拚

黃幼藻

字漢薦福建莆田縣人黃議之女也適林仰垣

苦節著有柳絮編

朱比玉云漢薦丰姿高秀少受業于老儒方泰年十三四工聲律通經史知大節儀部歿傾家以事其姑所居不蔽風雨近戚罕見其面年三十九患心痛卒生一子名鍾愛粵東山水祝髮名海印亦能詩

同諸姊春園鬪艸

小園花事盛安敢負春光
裊薄穿烟重苔深選草香
羸來珠共贈罰以酒相將
最恨流鶯意聲聲喚曉粧

孤雁

渺渺高秋外長空一雁遲
哀鳴關底事澹遠寫相思
瘦馬征夫泪迴文少婦詩
明年樓上過莫向夕陽時

雨中看紫芍藥

晨粧乍點自傾城冉冉香
生繡戶清厭說廣陵春色暮
臙脂和淚雨中傾

恨白芍藥不開

萬種花開鬪曉紅含羞無語倚東風
素妝不理因誰倦一段春藏粉黛中

筆精續訂莆田黃氏名幼藻家蘇州倅公議愛女也幼耽風雅韻言駢語皆臻妙境世父給諫公謙深加器賞以方謝道韞名其集曰柳絮編孀居無子散佚不傳存者十二首其詠雨中紅芍藥云云恨白芍藥不開云灼灼花開鬪曉紅玉顏寂寞怨東風素粧不理因誰倦一段春藏粉黛中

登樓望海

遙山層疊海雲開浴鷺飛鷗自去回
春水茫茫天不盡片帆浮動碧空來

題明妃出塞圖

天外邊風撲面沙舉頭何處是中華
早知身被丹青誤

但嫁巫山百姓家

黃幼縈

字漢宮幼藻妹也

詠月

清切空階月相依欲二更寂喧非一致千秋同此明蕭
蕭庭中女俯仰觸中情對此令人遠况乃兼秋聲淺深
各有感今昔寧無驚秋在孤吟外愁從何處生人生有
代謝萬物有衰榮茫茫乾坤裏相積為愁城欲挽西江
水一洗萬古情虛牕來素影清淚落寒檠

姚氏

江蘇嘉定縣人適同邑諸生王紱著有翠蘿居

詩稿

國朝練音初集姚氏孝廉師魯女孫嫁諸生王
紱伉儷相倡酬紱時遜為不及有翠蘿居詩稿
女瑞貞
才且艷

踏青

曲塘柳色已青青倦繡鴛鴦挈伴行信步綠雲芳草軟
滿頭紅雨落花輕鶯隨玉笛聲中巧魚擲金梭水底清
挽棹歸來新月上登樓取火晚粧成

憶亡夫

冰輪初墮漏將殘萬籟無聲青女寒鳳去碧梧秋瑟瑟

香銷繡戶夜漫漫三山縹渺魂何在
一室淒涼淚暗彈
追憶當年歡笑處等閒誰識會君難

張學象

字古圖號凌仙山西太原縣人張佚第五女也

佚七女皆能詩學象尤工駢體適林屋沈載公

中年而寡以苦節旌著有硯隱集

江南通志學象字凌仙與學典孿生詩名亦相埒集曰研隱中歲而寡貧不能自存學典分宅居之學象年老白髮絳紗為世女宗學典兩女芝芳女孫錦并能詩芝適當湖文學汪彩早寡無子依母氏以居有淑芳集

七十二峯足徵集張孺人名學象字古圖別號凌仙吳門望族與同懷姊羽仙俱工詩古文詞

羽仙為楊震伯先生德配凌仙適西山鎮下沈載公安貧樂志井白親操之暇不廢吟咏夫亡自課其子如嚴師時松江周礪巖太史金然卜居石公山與山中之詩人秦存古嘉銓周覲侯公贊相倡和聞凌仙名乃介覲侯遣女雙以疊韻詩乞和凌仙走筆立成周太史驚喜亦疊韻報謝云仙家浮玉北堂湖秀絕心清玉映徒采柏率蘿幽谷致焚香繡佛梵天圖閒調林屋單棲鶴靜對蓮塘隻影鳧珍重瑤華投贈向虞翻從此恨應無千樹梅花玉繞廬亭亭素對洞仙如獨吟豈譜青溪曲靈境常搜赤字書草解忘憂縈綺戶竹能抱節護幽居臨風疑佇憑青鳥正及銀牀報葉初東山席氏嘗延之為女子師所著硯隱集數卷姊羽仙選序

寫懷

人生同落花幸爾墮茵席雍容畫堂上窈窕珠簾側棠棣並芬芳椿萱復珍惜侍兒理雲鬢保母供膏澤容服

既光華禮儀復閒式幼無適俗韻宿負詩書癖所佩惟
芝蘭所親惟翰墨流覽古今篇忻然每忘食摘辭傲屈
宋選句摩元白揮毫霞落紙朗咏無晨夕自擬樂無涯
詎知運有極鸞鶴養修翎八表期瞬息忽遇宋都風墜
此青雲翼誤爲塵網羈有志竟不獲戢羽雞鶩羣困蹤
螻蟻域懷瓊與握蘭芳潔誰能識徒爾事文章不蒙稽
古力已矣復何言撫琴長太息阮籍慟途窮孔聖悲麟
出豈惟傷道喪更有憂貧感運會既如斯天意渺難測
翻成失馬翁常灑牛衣泣原生圭華門仲蔚蓬蒿宅陶
亮返東籬楊倫居大澤峻節凌松筠清名耀典籍奈爲
寒餒驅長歌行乞食熒熒薄命人念茲常慼慼緬焉起
深思景仰先賢德抱飢恒晏如屢空誠不惑莫訝鬢如
霜但令心似石生同逆旅舍寓形不滿百豪奢非所慕
榮悴相尋繹君子貴固窮求仁而自得在已何尤人聊
以寫胸臆

春晴曲

三分春色纔過一紫燕銜泥畫梁集綠染紅嬌帶淚痕
雨餘枝上花無力佳人拾翠芳亭遠號國金車異香滿
簾幙低垂午漏長萋萋芳草池塘徧流鶯百轉暖風輕
蘭蕙吐芽芳氣盈明媚韶光容易過愁眉蹙破遙山橫

卽事咏懷十四韻勉季兒
 牢落愁身事清吟強自寬招魂徒擬宋作誅漫追潘苦
 志歌黃鵠幽芳披紫蘭幼男愁學廢嬌女怯衣單喬木
 俄驚萎鴛原詎急難天心忌熾嶮世態極波瀾差免燃
 萁逼寧思負米歡從教荆樹折肯惜棗花殘危比巢堂
 燕哀同對鏡鸞更憂懸磬乏爭得覆孟安莫訴愁腸結
 空教淚血彈頰波雖若此造物豈無端但向雕龍切
 成畫虎看青雲如道在未必棄孤寒

歲暮感懷

有序

山齋晨起愁雲塞望庖突無烟葛屨練裙猶作
 禦寒之服湘蘭杞菊難供卒歲之糧嗟乎嵇紹

幼孤長卿早喪厚祿故人音書斷絕恒飢稚子
 意色淒涼昔之車笠申盟麥舟相助者復何人
 哉聊咏二章
 用抒悲憤

緝柳編蒲志苦辛半生多難已忘身橘林乏實供餽粥
 突舍無烟薦藻蘋空羨田真兄弟樂堪憐任昉子孫貧
 一函遺草誰為達檢得徒令淚滿巾

玉粒為餐桂作薪荆釵蓬鬢自悲辛桑麻廢盡猶征稅
 典籍遺來不救貧論著孝標難覓友詩哀承吉更何人
 生存零落俱堪慟却向塵中厭此身

山居

泉脉淙淙石溜深雙扉長掩五湖濱樓前但看峯千朶

牕外惟容月一輪已悟幻身同泡影不隨庸俗肆貪嗔
梅芬竹瘦幽如許合與靈威作近鄰

擬古

夙昔愛鳴琴流泉指下生子期今已沒誰聽斷腸聲

七夕

寶鼎香消欲卧遲蕭蕭松竹夜涼時人間一別成千古
莫怨仙家隔歲期

吳氏

浙江安吉縣人庠生徐鞏錫之室也早寡著有

詩集

安吉縣志庠生徐鞏錫妻吳氏定福鄉黃墓村人進士吳洪之女秉性端莊兼通文墨廿六歲而寡家徒四壁苦撫遺孤歐荻柳丸洵無愧焉守節四十餘年遺有詩稿具述棲居苦志畧採一二載入藝文

村居上元夜

玉宇澂澂皓魄圓銀花火樹太轟闐一龕燈禮三生佛
厭聽兒童唱采蓮

慕德琰

江蘇上海縣人庠生慕飛瞻之女也適同郡賈
乾照結褵三月而天死年二十六而卒著有焚

餘稿

方文耀慕氏傳畧德琰慕氏為吾友飛瞻季媛
 柔慧有則稟母教而女紅精巧與兩女兄實為
 閨中三秀而德琰尤工吟咏飛瞻固粹儒也為
 上海名諸生膝前惟以三珠自娛並授孝經小
 學女誠令為儒門賢淑女老懷足矣及吟咏漸
 多體裁又極工雅飛瞻亦心竊喜之余與飛瞻
 世親里閨垂髫知愛飛瞻取其詩以相質此余
 之所以得讀其詩也大抵不雕繪不激越溫柔
 澹遠以為神者也及笄後許字湖塘賈氏東床
 日乾照家本素封人亦少雋名噪文壇無何忽
 得瘵疾結禡方三月而玉樓遽召父母為之慘
 痛德琰曰兒命薄勿傷大人懷伯姑恩猶親姑
 非兒莫事相與安為可也伯母亦素賢德雅重
 德琰賢孝愛憐尤甚常令歸覲庶以天性之恩
 少解其天懷之摯孰知天之不弔又奪其慈氏
 集中哭母十六章乃孝女之杜宇血也從此身
 不忍離邁姑心神尤繫于老父恩義不能兩全
 膠固日戚德琰亦遂一病不能復起也讀其病
 中詩云八旬姑苦悵何依絕筆章又曰叮嚀老
 父空留句是血是泪當不復辨今迎柩歸與賈

君合窆則連理鴛鴦之誌信為
 不誣計其生平僅二十有六歲

春日閑窻

遲日春光麗庭階景色清
 草鮮沾雨潤花媚倚風輕
 燕乳穿簾煖鶯藏弄柳晴
 晝長人意懶信筆寫閒情

病中

薄命從來事事非
 豈知于我更多違
 傷心空具無窮望
 瘦骨將從何處歸
 兩月夫恩悲永別
 八旬姑苦悵何依
 有生到是無生好
 休怨回生藥力微

春雨

陰雲連日合寒透
 繡簾垂何事排愁去
 閒敲一局碁

夏日西窗晚眺

閒窗極目景蒼茫翠色參差遍野塘萬縷垂絲籠暮靄
半潭清灩泛斜陽雲鴉點點歸林靜風竹叢叢入晚涼
無限幽情來望裏稀微月影度東牆

徐氏

浙江海寧州人陳之芳妻也

述志

二十青春不見天身穿麻經淚漣漣孤子生來纔週歲
公姑早已背堂前

家貧夫死不勝悲鬻子恩勤腸百迴枯井汲泉無來路

有如孤鴈落荒隈

細葉菖蒲果是稀盆中石上立想基人人笑我根基淺

綠葉青青不帶泥

海寧州志陳之芳妻徐氏年二十二發居翁姑早
亡遺孤僅一齡絡緯蓬戶中貧不克舉火子長娶
婦而歿又撫孤孫授室所遇最為厄蹇嘗賦詩四
章見志其詩云云方古柏舟之咏何遜焉聞者墮
淚久之

方筠儀

安徽桐城縣人適同邑左文全著有含貞閣集

惜未之見

檢先夫遺草

鸚鵡才高屈數奇未開篋笥淚先垂平生映雪囊螢力
不見騰蛟起鳳時獄底龍埋光詎掩墓門鶴返事難期

九京應悔嘔心血百卷文章待付誰

隨園詩話桐城女子方筠儀嫁左君文全而寡年
二十有六卽守節以終有舍貞閣集其偶檢先夫
遺草
云云

